

**NATIONAL ASSEMBLY OF
SEYCHELLES**

Tuesday 16th December 2025

The Assembly met at 9am

National Anthem

Moment of Reflection

Madam Speaker in the Chair

MADAM SPEAKER

Mon a dir bonzour tou Manm. Tou dimoun ki pe ekout nou. E osi tou dimoun ki pe swiv nou *live*. Parey zot vwar nou'n ganny en *Revised Order Paper*. E nou annan *quite a lot* pou nou fini *by* Vandredi le 19.

Me selman avan nou pas lo bann keksoz lo *agenda*, mon ti zis anvi petet *issue* en pti leksplikasyon, e menm en koreksyon kot i konsern *Commission of Enquiry* ki Prezidan in *set up* lo size Assomption. Mon vwar i annan en mansyon kot i dir ki Lasanble in aprouv kreasyon sa Komisyon.

Me mon zis anvi fer piblik konnen ki aktyelman Lasanble pa ti bezwen aprouve sa Komisyon. Prezidan i annan diskresyon pou kre sa bann

Komisyon. So, zis en pti leklersisman lo sa *issue*.

Dezyenmman, apre miting ABC yer kot zot vwar i annan *Revised Order Paper*, ozordi nou pe pran nominasyon bann dimoun ki'n ganny nominen par Prezidan pou pos Anbasader. E zis en pti gidans kot i konsern *time management*, nou pou pran lerdtan edmi lo sak kandida.

So, parey nou ti fer letan nou ti pe resevwar bann kandida pou Minis, lerdtan pou bann kestyon e 30 minit pou bann lentervansyon. Oubyen si kestyon i fini pli boner nou annan plis letan pou lentervansyon.

Mon ti osi resevwar en *request* sorti kot Onorab Labonte, i ti anvi fer en pti komunikasyon la bomaten. Onorab Labonte?

HON ANDY LABONTE

Mersi Madanm Speaker. Madanm Speaker, mon dir ou mersi pou donn mwan sa loportinite pou mwan adres en sityasyon ki pe arive, ki pe devlope dan distrik Larivyer Anglaise.

So, mon ti a kontan komans par kondann sa bann aksyon degradan e degoutan ki pe deroule dan bannann Union Vale kote kot *Condo English*

River, kot i annan bann dimoun ki lo sibstans adikt droger ki'n groupe e zot pe lager avek gran kouto.

E sa i pe kre en lenkonvenyan pou tou zabitan Larivyer Anglaise. E mon anvi reasir tou zabitan ki mwan Onorab Labonte mon reste angaze. E mon re konfirm mon langazman pou kontinyen travay avek lotorite konsernen pou fer sir ki sa bann keksoz pa kontinyen.

E mon ti a osi kontan lans en lapel avek lotorite konsernen e tou zabitan kominote an zeneral pou nou travay ansanm e ede elimin bann tel aksyon parey. E mon reasir zot ki mwan mon pou la pou mwan kontinyen travay pou nou kapab eliminen.

E mon lans en lapel osi pou sa bann dimoun pou zot aret fer sa bann aksyon. E mon oule en mesaz for ki lotorite i antre pou fer sir sa bann keksoz pa kontinyen dan sa kanton. Mersi.

MADAM SPEAKER

Mersi Onorab. Nou ava aprezan pas lo bann *items* lo *Order Paper*. Madanm Clerk si ou kapab fer *Presentation of Papers*.

MADAM CLERK

Mersi Madanm Speaker. Bonzour Madanm Speaker. Bonzour tou bann Manm. Tou bann *staff* Lasanble. Tou dimoun a lekout. Bann papye ki pe ganny prezante i;

Office of the Auditor General - Special Audit Report on the procurement procedures of PUC.

Annual Report of the Auditor General for 2024.

Annual Report and Audited Financial Statements of the Financial Services Authority for the year 2024.

Activity Report and Audited Accounts of the office of the Auditor General. Mersi Madanm Speaker.

MADAM SPEAKER

Mersi. Mon aprezan pas lo 5enm *item*, ki *Public Bills*. Si ou kapab fer *First Reading* silvouple.

MADAM CLERK

Mersi Madanm Speaker. I annan 3 *Bill* ki pe ganny prezante *for First Reading*.

National Institute of Science, Technology and Innovational Bill, 2025. This Act may be cited as the National Institute of Science, Technology and

Innovational Act 2025 and shall come into operation on such date as the Minister may by notice published in the gazette appoint.

The Penal Code (Amendment) Bill, 2025; This Act may be cited as the Penal Code (Amendment) Act, 2025.

Public Persons (Declaration of Assets, Liabilities and Business Interest) (Amendment) Bill, 2025; This Act may be cited as the Public Persons (Declaration of Assets, Liabilities and Business Interest (Amendment) 2025. Mersi Madanm Speaker.

MADAM SPEAKER

Mersi. Nou pou aprezan pas lo Mosyon. Onorab Lemiel.

HON SYLVANNE LEMIEL

Mersi Madanm Speaker. Bonzour Madanm Speaker. tou mon bann koleg Manm Onorab. E tou dimoun ki a lekout. Madanm Speaker, mon pas lo premye Mosyon.

In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr. Jacques Francois Eugene BELLE as Ambassador Extraordinary and

Plenipotentiary of the Republic of Seychelles. Thank you.

MADAM SPEAKER

Mersi Onorab Gill.

HON CHURCHILL GILL

Mersi Madanm Speaker. Bonzour Madanm Speaker. Bonzour tou Manm e tou dimoun ki pe ekout nou. *Motion seconded.*

MADAM CHAIR

Nou ava aprezan resevwar Mr Belle dan *Chamber*. Si nou kapab osi al dan *Committee Stage*. Bonzour Mr Belle. Mon ava demann ou pou fer en prezantasyon 5 minit pou nou bann Manm.

MR JACQUES BELLE

Bonzour Madanm Chair. *Leader Government Business. Leader* Lopozisyon. Bonzour tou bann Manm Onorab. E Bonzour osi pep Seselwa ki a lekout.

I en gran loner, en gran plezir pou mwan adres zot ozordi e prezant mon lekor. Mon apel Jacques Francois Eugene Belle. Mon annan 40an. Mon en Seselwa. Mon 2 paran i Seselwa. Mon'n ne *La France* e mon'n retourn viv Sesel a laz 8an lepok komansman miltiparti.

Mon'n grandi La Poudrier, anvil epi Reef Estate Anse Aux Pins. E mon'n fer tou mon skolarite Sesel Lekol *Francaise, Independence School, Polytechnic*. Kot mon'n ganny labours Gouvernman Sesel pou fer mon letid Liniversite *La France*.

Ozordi mon en *lawyer* par formasyon, *Diplome* Liniversite *Nantes*. E mon annan osi en *Master of Law* dan Teknolozi Enternasyonal Liniversite *Turin*. Par profesyon mon en *career diplomat* savedir en *diplomate de carrière* karyer avek plis ki 15 an servis dan Minister Zafer Etranzer. E mon'n partisip e reprezant nou Larepiblik dan plis ki en santenn konferans enternasyonal atraver lemonn.

Apre mon letid liniversite, mon'n komans mon karyer profesyonnel a laz 23an koman trwazyenm e dezyenm sekreter dan Seksyon Zafer Legal. Apre mon'n vin premye sekreter dan Biro *PS Foreign Affairs* ziska ki mon'n ganny promouvwar direkter zeneral pou zafer protokoler, konsiler, Maritim e *la diaspora*.

E an 2022, mon'n vin *chargé d'affaires Paris* setadir sef misyon Lanbasad Sesel an *France* pandan 1an. E aktyelman mon pe servi depi

2an edmi koman konsiny Ministeryel kot Lanbasad Sesel Paris. Mon'n osi reprezant mon pei dan bann *forum* rezyonal e enternasyonal sirtou lepok ler pei ti pe fer fas ek piratri.

An 2011 mon ti en konsiltan lo piratri baze kot *COI Ile Maurice* kot mon'n ede met an plas enn parmi bann programm Eropéen pli enportan dan rezyon Lafrik Les lo sekirite maritim, valer €37.5milyon.

Lannen swivan mon'n pran responsabilite a programm lo nivo rezyonal kot mon'n ganny apwente Direkter *Anti-Piracy Unit* kot *COI* pandan 4an. Mwan ek mon lekip rezyonal ti ede etabli e fer marse biro *COI* Sesel pou konbat e elimin piratri maritim.

Nou'n osi kontribye pou met an plas premye sant rezyonal kordinasyon loperasyon lo lanmer Sesel an 2016, ki ozordi i tonm anba responsabilite Minister Lenteryer. Mon'n travay etrwatman avek Gouvernman sirtou ler Sesel ti pran prezidans group kontak enternasyonal lo piratri kont Somali.

An 2016, prezide par ansyen Minis Morgan e apre par Minis Faure. Ant 2017 ziska 2022, mon'n osi ansarz Komisyon Losean Endyen

koman zofisye permanan de rezyon. E prezidan *Comité des OPL*. Ansanm avek Ansyen Vis-Prezidan Vincent Meriton e Minis Faure nou'n fer plizyer misyon, dialog dan larezyon partikilyerman *Madagascar* ek *Comores* pou kontribye dan stabilite e lape dan Losean Endyen.

Nou dosye *Francophonie*, sa osi ti enn mon bann responsabilite pandan plizyer lannen. Permet mwan Madanm Chair, pou azout sa pti bout an *française. Patriote seychellois et francophone, secrétaire et membre de la Commission internationale de la Francophonie depuis mais tout débuts au ministère. Puis promu correspondant national ... des Seychelles auprès de l'OIF, et Président du Réseau régional de l'Océan Indien de la Francophonie auprès de leur bureau à Madagascar, pour être aujourd'hui le représentant permanent adjoint des Seychelles auprès du siège de l'OIF à Paris, j'ai apporté et je continue donc d'apporter ma modeste contribution à la promotion de la langue française dans notre pays.*

Osi, mon'n fer plizyer *consultancy* pou bann lorganizasyon enternasyonal enkli *UNODC, IMO, Linyon*

Eropeen, Linyon Afriken kot mon'n partaz mon lekspertiz legal lo sekirite maritim e mon'n eksperyans dan lalit kont piratri. Lo nivo personnel, mon en papa, mon annan en pti garson ki annan 4an. Mon viv en lavi senp. E dan mon letan lib parey tou dimoun mon kontan lo lans. Mon kontan al lo montanny, mon kontan *hiking*. E mon kontan osi manz en bon manze an fanmir - annefe en bon manze kreol. Mon reste a zot dispozisyon pou reponn tou kestyon ki zot kapab annan.

Me an konklizyon permet mwan Madanm Chair, pou remersi avan tou mon bann paran ki'n byen elve mwan. Tou mon bann *teacher* lekol ki'n byen edik mwan. E osi Gouvernman, nou Prezidan Patrick Herminie, son Vis-Prezidan Sebastien Pillay ek son *Cabinet* pou rekonnet mon konpetans e pou donn mwan zot konfyans. E osi, e sirtou Bondye Papa.

Akoz si ozordi mon pe *comparaître* devan zot Manm Onorab se pa par azar. Mon'n travay dir, mon'n reste *focus* pou ki en zour mon osi mon kapab ganny sa sans reprezant mon pei o pli o nivo. Pou mwan kapab osi en zour egzers sa pos o responsabilite.

E ki sa i vin en laspirasyon pou tou bann diplomat de karyer ki pe esper zot moman osi, enkli sa bann ki'n abandonn tro boner. Mon remersi zot tou pou zot latansyon. Mersi Madanm Chair.

MADAM CHAIR

Mersi. Nou ava aprezan pran kestyon. Onorab Woodcock.

HON WAVEL WOODCOCK

Mersi Madanm Speaker. Bonzour Mr Belle. Tou Manm e tou dimoun a lekout. I en plezir ozordi bomaten pou nou war en zenn profesyonnel, konpetan devan nou Lasanble. Annefe nou parante.

Mr Belle mon premye kestyon pou ou, mon konnen e en pwen ou ti responsab kot i konsern bann size *diaspora* bann Seselwa ki pe reste aletranze. Mon konnen sa i en topik ase enportan. Par kont, par lefe ki nou annan en kantite nou popilasyon ki pe reste dan plizyer pei aletranze.

Mon konnen ou ti pe travay lo en *database* pou ou idantifye tou bann dimoun, tou bann Seselwa ki pe reste dan bann pei etranze. En pti pe si ou kapab dir nou dan lepase ki zistans ler ou ti okip sa pozisyon zot in arive pou zot

travay lo sa *database* pou zot reganny sa koneksyon avek nou bann Seselwa aletranze.

E si ou ganny apwente koman Anbasader, en pti pe ki rol ki ou pou zwe pou kontinyen rod sa bann nou bann frer aletranze e pou batir sa relasyon. E osi pou ankouraz zot pou petet retourn Sesel ouswa menm kot zot ete pou aport en kontribisyon anver nou pei Sesel ? Mersi.

MR JACQUES BELLE

Mersi Msye Onorab. Mersi Madanm Chair. Annefe parey ou konnen mwan menm mon en *diaspora*. Mon'n ne *La France*, i en dosye ki a ker. E annefe parey ou'n dir mon'n ede pou met an plas premye *Diaspora Unit Foreign Affairs*.

E annefe lefe ki osi mon'n ganny sans reprezant Sesel a Paris koman *chargé d'affaires*. Premye keksoz ki mon'n fer se fer sir mon konekte ek komite Seselwa. Annefe, en bon pe i konn mwan an plis. E annefe ler mon ti *Foreign Affairs* nou ti annan en *database*, nou'n fer mannyer nou fer si en *registry* aköz i ti enportan. Aköz ziska prezan nou napa en sif ofisyel *diaspora* dan lemonn. Me nou annan en pe en lide nou konnen ki i annan en kantite Lostrali.

I annan en kantite Lerop, *La France, Italy* e Canada, so, sa i en travay ki annefe i kontinyen e lefe ki ozordi parey ou konnen *Foreign Affairs* i vin asosye ek *diaspora*, zot pe donn sa lenportans, pe vin en *portfolio* enportan. Annefe zot pe al fer en divizyon.

So, i en gro travay ki nou'n fer. E i en travay ki zisteman pe *on going*. E sa i en keksoz ki zisteman mwan antan ki Anbasader, mon pou byensir pran sa as en *key priority* aköz nou bezwen kontinyen konekte avek nou bann Seselwa aletranze. E ti vre ki nou bezwen admit ki ti annan en moman vre zot pa ti tro, ti napa bokou langazman.

Me an tou ka keksoz in sanze, lepok in sanze e keksoz pe vin pli si oule pe vin dan sa nouvo zenerasyon kot nou anvi ki nou santi ki *diaspora* i kapab ed en kantite nou lekonomi. E nou'n ganny en kantite sipor avek bann lorganizasyon enternasyonal parey *IOM*.

I annan an tou ka en volonte. En volonte avek Gouvernman dizour osi pou zisteman fer sir ki sa travay i kontinyen. E ki vwala nou fer sir osi ki nou lekonomi osi i pa lezot pei ki depan bokou lo *diaspora*. Nou fer mannier ki osi Sesel i kapab fer mannier

pou nou kapab enterakte en pe plis ek zot e nou kapab *meet halfway*. Ki annefe nou ranforsi nou lekonomi avek sipor tou nou bann Seselwa atraver lemonn. Mersi msye Onorab.

MADAM CHAIR

Onorab Gill.

HON CHURCHILL GILL

Mersi Madanm Chair. Bonzour Mr Belle. Nou tre apresye pou annan ou parmi nou ozordi. Mon premye kestyon ler mon'n *glance through* ou CV. Mon'n vwar ki ou annan en serten kapasite ekspertiz dan maritim.

E parey nou konnen Sesel tre byento pou angaz li dan en proze tre anbisye, kot i annan plan pou grandi nou Por Komersyal atraver posiblerman finansman atraver Linyon Eropeen. Mon kestyon sete donnen ou leksptertiz maritim, sekirite maritim. En tel proze i pou definitivman ed Sesel en kantite, an term son devlopman maritim.

Eski vi ki nou le bouz lo sa lot *level*, eski ou krwar nou kapasite sekirite maritim zour ki nou pou ariv lo sa lot *level* i annan nesesite kot nou pou bezwen abord serten size pou nou kapab azour. E oubyen lezot bann Bato Maritim ki frekant Losean Endyen, zot a

santi zot alez pou kapab vin *transact* avek Sesel vi ki i en Por Komersyal. E son retonbe se pou ekonomik Sesel? Sa i mon premye kestyon.

Mon dezyenm kestyon ankor dan ou lekspertiz maritim, nou konnen i annan *IMO* ki bokou keksoz i dekoultre atraver *IMO* kot i konsern sekirite maritim. Eski ou krwar *given* ou lekspertiz ou krwar ki Sesel ozordi i *compliance* ek sa bann *requirements* ki *IMO* i demande.

E ler ou ganny apwente Anbasader si sa osi i en dosye ki ou krwar ou pou zet en lizye lo la pou asire ki Sesel nou reste *compliance*, e nou kapab benefisye avek tou lezot keksoz ki vin avek sa ? Mersi.

MR JACQUES BELLE

Mersi bokou msye Onorab pou ou kestyon. Efektivman i annan en proze ki ganny finanse par Linyon Eropéen e osi par Lazans *Française* devlopman konsernan lekstansyon Por Komersyal Victoria. E mwan mon panse i enportan i tre enportan.

Akoz parey ou konnen, nou pa en pti pei nou en gran nasyon maritim kot nou kapab met 2 fwa *La France* en pwent 2 kilomet kare. So, i enportan ki nou annan en lenfrastruktir ki

alaoter kot nou kapab prezan patrol dan nou delo, aköz i annan en kantite bann menas maritim, piratri i ankor la. I annan trafik drog parey zot konnen.

I annan lapas ilegal, i annan lezot kalite menas. E donk, lefe ki nou pou annan en por ki osi i pou pli gran, kapasite pou pli gran nou pou kapab zisteman i pou ed nou. Parey mon'n mansyonnen taler dan mon *statement* i annan sa sant rezyonal loperasyon ki sa osi i ede, aköz nou pe kordin ek lezot pei dan larezyon avek bann Manm la *COI* e osi bann *neighbor* dan *L'Afrique de l'Est Kenya, Tanzanie* e osi bann pei dan Lerop bann pei enternasyonal.

E se sa anfet pou nou kapab si oule protez nou delo e pou nou kapab osi fer ki nou bann komers maritim i ganny fer san problem i enportan korperasyon rezyonal. Se pou sa nou'n lager zisteman pou met an plas sa sant. E mon byen fyer sa i ankor la e i pe mars byen.

E annefe mwan dan mon pos as Anbasader, mon pou byensir kontinyen sa dyalog avek sa bann lorganizasyon enternasyonal tou sa bann partner ki'n ed nou, pou fer sir zisteman ki nou osi kapab

benefisye dan lot proze lenfrastruktir. Ou konnen akòz Sesel i kapab en gran pei *archipelagique*. E nou bezwen konmsi kontinyen regarde ki mannyer nou kapab ganny en bann benefis akòz nou vreman ekspoze dan sa bann kalite menas maritim. I annan bokou.

E an plis osi mon anvizyon ki mon'n ede osi met an plas en strateji *Maritime Security 2010-2030*. E kot nou'n dir dan bann *long term goal*, nou bezwen annan bann lenfrastruktir ki adekwat ki kapab zisteman ede ranfòrsi konmsi ranfòrsi kapasite pou nou konbat, pou nou elimin *as much as we can* sa bann menas maritim.

Lo size *IMO* definitivman fòdre e i annan en komite ki la ki pe fer sir i anliny sa bann *compliance* sa bann norm enternasyonal. E sa i en keksoz ki vreman enportan, akòz si nou pa pe *comply* nou pa pou kapab ganny en benefis nou pa pou kapab ganny bann *funds* sorti dan bann lòganizasyon enternasyonal.

So, sa i en keksoz byensir ki *Foreign Affairs* i pou fer sir ki zisteman kolabore ek sa bann lazans konsènen, bann Minisè konsènen bann lazans konsènen pou ki fer sir nou reste an norm, pou nou

kapab zisteman benefisye o maksimòm pou nou kapab zisteman kapab zisteman ranfòrsi nou bann kapasite maritim. Mersi bokou.

MADAM CHAIR

Onorab Monthy.

HON PHILIP MONTHY

Mersi Madanm Chair. Bonzour Madanm Chair. Bonzour tou Manm Onorab. Bonzour Mr Belle. E tou dabor felisitasyon pou ou nominasyon. En zanmi personnel e mon fyer ozordi mon vwar ou la. 2 pti kekyon.

La ki ou'n ganny nominen pou vin en anbasader, savedir ou al lo en lot nivo. Ki sa pou permet ou fer, desarje koman ou responsabilite ki petet avan koman *chargé d'affaires*, lezot fasilite ki ou'n okipe oparavan pa'n permet ou fer. Ki la ki ou pe vin en Anbasader i pou donn ou lopòrtinite pou ou kapab fer pous serten keksoz pli devan ki petet oparavan ou pa ti kapab ?

E en lot kekyon vi ki ou afilyasyon avek *La Francophonie*, lalang *Francaise* nou konnen nou'n kolabor plizyer fwa lo bann proze pou promouvwar lalang *Francaise* dan lepase. Dizon ou ganny poste *Paris* kot ou deza la été, eski ou santi i annan serten

mank dan sa i konsern lalang *Française*, promouvwar lalang *Française* isi Sesel.

E si dizon ou ganny poste *La France*, kwa ki petet ou kapab fer pou adres sa size pou fer ki lalang *Française* i ganny son vre plas koman enn nou bann lalang nasyonal isi Sesel? Mersi.

MR JACQUES BELLE

Mersi bokou msye Onorab pou ou bann mo felisitasyon. Annefe wi, nou'n travay bokou osi dan *La Francophonie*. Ou ti en *teacher* a en moman donner, ou'n ede. Pou reponn mon a komans par dezyenm kestyon.

Wi, mon panse i annan en kantite travay pou fer. i annan annefe parey zot konnen i annan en proze ankour la ki apel *Mobilité des enseignants*, kot Sekreter General OIF in aprouve pou anvoy plizyer bann *teacher* dan tou bann lekòl primer pou ranforsi en pe pou train bann *teacher* Franse pou fer sir ki zisteman Franse i ganny si oule valorize ou plito dimoun i kapab koze - *even* i annan en konpleks en pti pe i pa oze koz franse.

E sa i en travay ki nou'n fer. Zisteman dan *Commission Nationale de la Francophonie*. E pou reponn ou kestyon mon krwar sa ki enportan, akòz nou

menm si nou *Paris* nou pe fer en, nou pe sey fer maksimonm. E mwan an tou ka mon annan bon lantant avek sa bann dimoun laba *OIF Secrétaire Generale* and so on.

Sa ki enportan se osi ranforsi sa *Commission Nationale de la Francophonie* isi. Fodre ou *coordinate* avek tou sa bann *représentants de la Francophonie* a tou bann diferan Minister. E fodre sa bann miting i ganny fer en *manner régulière*, kot apre nou tou nou konnen, nou tou nou koz menm koze ki la nou pou al defann nou bann lentere onivo *OIF*, nou pe koz en sel langaz i enportan.

E mon krwar sa i en travay ki nou tou nou kontinyen lalang *française*. Se pou sa zot in permet mwan koz an *française* parski i en langue ofisyel lo menm nivo ki lang Kreol e lalang Angle. E pa bliye dan larezyon Losean Endyen annefe nou antoure ek bann *francophone*.

Se pou sa mon panse i en keksoz ki nou bezwen osi byensir si mon reste *Paris* mon pou kontinyen sa travay. E mon krwar nou pe al dan bon direksyon. Mon ase pozitiv lo la. Mersi.

Donk, dezyenm kestyon lo nivo si mon Anbasader si zot

konfirm mon pos Anbasader, byensir mon pou egzers sa rol ki protez e promot lentere Sesel, e lentere Seselwa. Mon'n deza pe travay Lanbasad Paris, mon pe zwenn bann *diaspora* Seselwa pa zis *La France* me osi diferan kwen Lerop.

Parey ou konnen, nou pe osi fer bann *passport* biometrik. So, i annan en kantite bann Seselwa ki pe renouvle zot *passport* tousala. So, pou mwan i en keksoz ki enportan, mon pou dan en meyer pozisyon si oule pou protez zot, pou defann zot. E osi byensir mon pou dan en meyer pozisyon pou mwan kapab lyez direktman avek bann anbasader, bann Minis e pou donn mwan si oule sa *go ahead* pou mwan kapab zisteman fer ladiferans.

In fact, I am looking forward for it, aköz mon santi ki sa bann leksperyans ki mon'n akimile mon panse ki mon annan sa konfidans e sa kapasite pou mwan fer li. Mersi bokou msye Onorab.

MADAM CHAIR

Onorab Gabriel.

HON CONRAD GABRIEL

Mersi Madanm Chair. Mon a dir bonzour tou dimoun a lekout. Dabor felisitasyon Mr Belle pou ou nominasyon koman

Anbasader. Ler mon pe get ou CV, ou for dan *la diplomacy* konbinen avek en *background* legal ase solid.

Premyerman, petet briyevman ki mannier ou vwar nou relasyon diplomatik avek bann lezot pei? E petet kwa ki nou devret pe fer pou kontinyen sa relasyon bilateral, miltilateral? E dezyenmman petet an ka ou ganny nominen koman Anbasader, petet ki bann reform ki ou pou anmenn dan pei pou elev la nivo diplomasi? Mersi.

MR JACQUES BELLE

Mersi bokou msye Onorab pou ou kestyon. Ou konnen ler mon'n ganny poste *Paris* koman *chargé d'affaires*. Premye keksoz ki mon ti fer mon ti al war tou sa bann Anbasader dan larezyon, ti al demande pou al war Anbasader Moris, Anbasader Comores, Anbasader *Madagascar*.

Mwan mon krwar sa ki enportan se nou bezwen annan en bon vwazinaz avek tou bann *neighbor*, avek nou bann vwazen se sa lakle. Se sa lakle e i aköz nou en pei nou en lavwa dan Nasyon-z-Ini *and all*, me selman annandler nou lavwa pe ganny plis tande si konmsi kolabor avek nou bann vwazen.

E annefe se pou sa ki ozordi avek Moris nou annan bann ekselan korperasyon. I annan osi bann bon korperasyon avek la COI avek Comores. Comores ki pe prezid la COI. E sa i en keksoz ki enportan, aköz larezyon se vreman lakle. Sa se lo nivo rezyonal. O nivo enternasyonal egalman nou pou bezwen kontinyen rebran nou pei dan bann, an tou ka nou deza manm bokou bann lorganizasyon enternasyonal parey Linyon Afriken, parey Linyon Afriken, Nasyon-z-Ini.

Donk, nou bezwen kontinyen. E lefe ki nou pou osi annan *hopefully* nou pou ganny bann nouvo lanbasader sa osi i ava ede pou nou kapab si oule promot vizibilite nou pei. E an tou ka mwan ki mon anvi dir, se reform i annan en pwen ki enportan se lefe ki nou en pti leta zil ensiler nou vilnerab.

E sa i en keksoz ki nou bezwen fer sir pa inikman avek bann zil Losean Endyen. Me tou bann zil, bann *Small Island Developing State* dan lemonn antye, nou bezwen kontinyen sa *advocacy* sa pledwari pou nou kapab fer sir ki bann *international financiers* bann *international organization* ki pare pou ed Sesel zot pa

kontinyen pini nou, penaliz nou aköz nou *GDP* i o.

Annefe se sa en vre *challenge*, lefe ki nou *GDP* i o nou pe ganny pini e nou pa pe gannyen sa bann lasistans pou devlop lekonomi nou pei. So, sa i enn bann reform ki nou bezwen fer sir ki nou pou kontinyen. Nou pou fer sir ki nou vwala ki nou pou kontinyen mobiliz zisteman nou bann vwazen, nou bann pei dan larezyon.

Me osi tou sa bann *Small Island Developing States*. Annefe lo nivo UNESCO nou annan osi bann *group of friends of SIDS*. Nou deza anna en lekip ki travay ansanm, pou nou fer sir ki nou kapab fer en ladiferans ki osi nou pei konmsi i ganny pran an kont dan bann lasistans enternasyonal.

Donk, vwala i en travay ki nou pou kontinyen. E avek tou sa bann. E osi mon anvi dir ki i non selman i annan bann Lanbasad, me osi fodre pa bliye i annan en santenn Konsil Onorer dan lemonn. E sa bann konsil laplipar zot dan bann pei kot napa okenn lenportasyon diplomatik. E zot la osi pou donn sa sipor nou bann lanbasad pou fer ki zisteman nou ranforsi nou bann korperasyon bi bilateral ek bann pei.

E ki vwala ki Sesel bann lentere, bann azanda Sesel i ganny reprezante. I ganny defann dan meyer kondisyon posib. Mersi msye Onorab.

MADAM CHAIR

Onorab Romain.

HON GEORGES ROMAIN

Mersi Madanm Chair. Bonzour Madanm Chair. Bonzour Mr Belle. Mon osi mon ti a kontan profite pou felisit ou dan ou nominasyon. Mr Belle, an regardan ou CVi montre ki ou'n anmas en kantite leksperyans dan kad travay dan relasyon etranzer parey ou'n dir 15 an.

E pou mwan mon ti a kontan demann ou en kestyon. Pou ki i vedir vin en Anbasader pou reprezant ou pei? Sa i mon premye kestyon. Apre mon dezyenm kestyon Madanm Chair, ki bann sekter ki ou panse Sesel i devret fer plis zefor pou promouvwar o nivo enternasyonal e ki fason koman en Anbasader ou pou ede pou fasilite sa? Mersi Madanm Chair.

MR JACQUES BELLE

Mersi msye Onorab. Ki savedir Anbasader. Be anfet mon pou reprezantan personnel Prezidan aletranze. E mon pou byensir osi reprezant Lepep Seselwa

aletranze dan sa pei kot ou pou ganny akredite.

E annefe pou en diplomat de karyer parey mwan menm se pos annefe i en rev pou mwan. Mon toultan reve en zour kapab deservi sa pos. E vwala si zot donn mwan sa loportinite mon pou fer li. E avek sa rezo ki osi mon'n etabli laplipar bann pei kot mon'n ale sirtou larezyon e osi Lerop *La France*, pou mwan i en loner an tou ka. I en gran loner pou mwan kapab egzers sa rol Anbasader.

E kote ou panse. Dezyenm kestyon, kote ou panse pou ou kapab *improve*. Mwan mon krwar se plito osi lo kote komers rezyonal. Konnen, Sesel nou pe *train* bokou avek bann pei ki en pe lwen. Alors, ki annan bann pei ki akote ou konnen parey *Madagascar* e *Comores*, Moris kot mon santi i annan en travay ki devret ganny fer *as well* pou nou kapab regarde posibilite pou nou liberaliz en pe sa bann komers *of goods*.

Of you know i annan en kantite marsandiz ki'n pour kwa pa Sesel in benefisye osi direkteman ek son vwazinaz. In annan en travay lo la, epi byensir mon'n koz lo sekirite maritim. Sekirite maritim osi i annan en travay osi pou fer. Nou bezwen ranforsi nou bann kapasite.

Nou bezwen ranforsi nou bann kapasite akòz nou vilnerab e nou pou toultan vilnerab, *so long* ki nou pa pe met le mwayen. Se pou sela nou bezwen nou as Anbasader, bann diplomat an tou ka nou bezwen sansibiliz zisteman lakominote enternasyonal lo lenportans ki zot devret ed nou.

E se pou sa, sa parey mon ti pe dir sa zafer sa pledwari pou bann *Small Island Developing State* pou zot lakominote enternasyonal pran kont en *Multi Vulnerable Index*. Sa i enportan e in deza i apel sa *NVI* in deza ganny adopte par Nasyon-z-Ini.

Now, it is all about the mizanplas implementation. E sa i en travay ki byensir nou bezwen fer sir, akòz *once* sa i ganny enplimante i ganny pran an kont par tou bann pei enternasyonal. E *by then*, nou pou kapab *improve* kot i annan pou *improve*. Mersi bokou Msye Onorab.

MADAM CHAIR

Onorab Trevor Louise.

HON TREVOR LOUISE

Bonzour Madanm Speaker. Mersi Madanm Chair. Bonzour Mr Belle. Bonzour tou dimoun ki a lekout. Felisitasyon lo ou nominasyon Mr Belle.

Mon kestyon pou ou se, koman en Anbasader byento ki mannyer eski ou pou asire ki nou kiltir i ariv lo nivo enternasyonal osi rezyonal? E mon dezyenm kestyon se koman en dimoun ki'n dan *Foreign Affairs* pou tou sa letan. E ou'n osi annan leksperyans enternasyonalman. Ki bann mezir ki ou pou pran koman en nouvo Anbasader pou asire ki i annan larelev. Pou asire ki i annan lezot dimoun ki bann lezot zenn petet ki anvi antre dan domenn diplomasi ki kapab ganny sans e loportinite osi pou kapab ganny poste enternasyonal. Ouswa petet bann *training* e leksperyans osi. Mersi.

MR JACQUES BELLE

Mersi bokou msye Onorab pou kestyon. Bon, kiltir annefe wi i tre enportan. Mon krwar i enportan, akòz annefe kot mon ete *Paris* i annan sa *UNESCO*. Se li menm li sa lorganizasyon ki la ki pou ede promouvwar bann diferan kiltir.

I annan parey ou konnen nou patrimwann moutya en ladans kiltirel ki'n ganny rekonnet o nivo *UNESCO*. E sa i en keksoz ki nou bezwen kontinyen. E menm si nou pou dan baze aletranze dan Lanbasad i annan sa Festival

Kreol mon krwar nou bezwen osi met bokou plis lanfaz.

E sa i se en toultan i ti la tou fason. E nou bezwen fer sir nou osi si oule promot sa levennman kot ou ete dan lemonn. Se akòz i annan bann levennman ki pou ede osi si oule atir en pe bann diferan pei. E bann diferan dimoun ki enterese pou ede ranforsi nou kiltir. Nou kiltir i bezwen annan mwayen osi. La ozordi nou annan en Minister. I enportan ki zisteman nou akòz nou lidantite nasyonal.

E kiltir definitivman i form parti osi nou bann *Foreign Policy* pou nou. *Well*, tou fason ek *diaspora*, *la diaspora* annefe si nou bann Seselwa deor ki osi ed nou akòz zot osi bann Anbasader en. Zot osi en Anbasader dan en serten fason, se zot ki ede ler zot fer zot pti *gathering* se zot. Zot envit bann etranze, se sa ki ed osi pou promouvwar nou kiltir. I en keksoz ki byensir i pou toultan en priyorite pou an tou ka pou nou Minister.

E dezyenm kestyon, se byensir larelev. E i annefe fodre nou ankouraz nou bann diplomat an tou ka dan nou Minister bann diploma de karyer, pou zot ganny lespwar ki en zot osi zot kapab konnen, ganny sa bann loportinite pou

non selman vin Anbasader. Me osi kapab ganny poste dan en Lanbasad.

E se pou sa ki i annan en *training* plan pou zot ganny sa sans osi ler i annan ban miting enternasyonal zot akonpanny bann Minis, zot akonpanny ou konnen bann Direkter Zeneral. So, i annan byensir mon an tou ka mon'n profite, mon'n ganny sa sans benefisye sa bann diferan *course*.

Mon ti fer en *course* annefe *Paris* si ou byen mon CV mon ti fer en *course* diplomasi konsernan ladministrasyon. E mon krwar i enportan ki nou *retain* nou bann diplomat, nou donn zot si oule lespwar e motivasyon. E se pou sa ki nou bezwen kontinyen sansibiliz osi lepep.

E byensir sa bann ki enterese zwenn nou dan sa lavantir diplomatik, akòz mwan mon osi mon leker i fermal ler mon war dimoun i ale. E mon triste, mon anvi reste akòz nou bezwen plis diplomat anfet akòz sirtou ki byento nou pou ouver en nouvo Lanbasad.

So, nou bezwen mobiliz tou nou bann diplomat pou zot reste pou zot kapab annan sa posibilite. E byensir i pou annan en rotasyon pou zot kapab ganny sans osi al dan bann diferan Lanbasad. E osi

en zour egzers sa pos pli o, lo pli o nivo. Mersi bokou.

MADAM CHAIR

Onorab Savy.

HON DOMINIC SAVY

Mersi. Bonzour Madanm Speaker. Bonzour Mr Belle. Bonzour tou Manm Lasanble Nasyonal. E bonzour tou dimoun ki pe ekout nou. Mon santi mwan privezye pou ganny sans travay en pe avek ou Mr Belle pandan letan ki mon'n kot *NISCC*. Ki konponan lokal sa santosi ki ou'n fer masyon lo la.

Dayer felisitasyon pou reisi sa lakonplisman. Ler nou koz lo sekirite maritim nou tre souvan bliy resers ek sovtaz, *search and rescue* an Angle. Ki ozordi i enn bann manda *NISCC*. Alor, koman en *expert* maritim ki pe vin en Anbasader, ki ou lopinyon e ki ou panse ou kapab fer dan ou nouvo fonksyon pou elev nivo resers ek sovtaz pou donn tou dimoun dan pei en meyer servis. An dot mo ki soutyen ou pe mazin anmennen pou *NISCC* dan son fonksyon resers e sovtaz e dan lezot fonksyon an zeneral? Mersi.

MR JACQUES BELLE

Mersi bokou msye Onorab. Wi, annefe mon rapel ou byen, ou ti travay dan *NISCC*. Well, mwan mon ti dan.... Osi, Annefe mwan mon ti dan *Anti-Piracy Unit*, mon'n ede met an plas sa sant. E ou ti a kote, e annefe ki pou reponn ou kestyon.

Donk, mon krwar nou bezwen byensir fer sir ki nou kapasite i ganny ranforsi. E travay ki nou pou fer parey ou'n dir taler nou pou kontinyen dyalog avek bann lorganizasyon enternasyonal parey *IMO*, parey Linyon Eropeen, parey *L'AFD* - *L'AFD* osi mon'n ganny sans mwan zwenn sa direkter *Paris* e mon'n koz avek li. E se sa ...

An tou ka, mon pou servi rezo ki mon'n deza etabli a la rezyon e enternasyonal pou vwar ki mannyer zot kapab ranforsi sa sant nasyonal an *parallel* avek sa sant rezyonal. Sant rezyonal parey ou konnen i ganny finanse par Linyon Eropeen. Sa sant nasyonal se Gouvernman ki pran *ownership*.

E byensir avek la *COI*, zisteman. La *COI* ki pou kapab osi regarde ki mannyer nou pou kapab vwar bann lezot proze ki kapab ede lo nivo *training*. Par egzantp bann formasyon bann zofisye, sa mon krwar i annan en bezwen. E osi mon konnen e nou fer sir an tou ka si mon

ganny sa loportinite vin en Anbasader mon pou fer sir nou kontinyen bann *workshop* ki ti ganny fer *REFLECS*.

Mon rapel en kantite bann *workshop*, bann *training*. Donk, sa i en keksoz ki byen definitivman nou pou travay lo la. Ou konnen parey mon'n masyonnen taler mwan mon'n travay mon'n ede ek en stratezi pou 2010-2030 lo *maritime security* sa i ankor on. E nou bezwen fer sir nou enplimant li. Kot prezan nou kapab zisteman ed sa bann striktir ki pe ede konbat piratri sirtou nivo nasyonal.

So, sa i en travay byensir ki nou pou kontinyen fer, aköz i en luvraz ki vremen enportan parey mon'n eksplike nou en *huge maritime nation*. E nou bezwen sipor nou bann pei. Mersi bokou Msye Onorab.

MADAM CHAIR

Onorab Larsen.

HON CECILE LARSEN

Mersi Madanm Chair. Bonzour tou dimoun spesyalman zabitan Au Cap ki a lekout. Avek ou permisyon Madanm Chair, mon ti a kontan pas mon kondoleans avek lafanmir Pillay ki'n perdi enn zot pros Mr Stephen Pillay. En fanmir ki mon annan bokou memwar

depi lanfans. Alors, lafanmir Pillay kominote Pointe Au Sel e zanmi pros mon pran par dan zot maler ki Steve i repož anpe.

Mr Belle bonzour. Felisitasyon pou ou nominasyon. Mon kestyon pou ou se ki ou rol enportan ou krwar ban pti Leta Zil parey Sesel i kapab zwe pou fer diplomasi enternasyonal vin pli efikas? Mersi Madanm Chair.

MR JACQUES BELLE

Mersi Madanm Onorab. Bann Leta Zil i kapab fer la diferans nou bann defi komen. Bann *challenge* ki nou pe ganny konmsi fer fas ansanm komen. Parey sanzman klimatik. Sa i en keksoz i en fe. I pou annan bann zil dan no larsipel ki pou disparet, sirtou bann zil koralien.

So, i en keksoz ki nou, nou bezwen kontinyen fer tapaz ansanm fer lavwa pli for. Aköz sa i en keksoz ki i pou i pou en menas. Donk, i annan sa e ansanm osi nou kapab fer ladiferans o nivo par egzant proteksyon lanvironnman parey mon'n dir. E osi byen ki sekirite maritim.

E osi nou kapab fer la diferans o nivo promosyon lape e la stabilite dan lemonn. Aköz bann *petite iles ensileur* i annan en kantite anfet. I annan bann

ki dan Losean Endyen, Losean Atlantik, Losean Pasifik. E i annan en lalyans anfet ki zot zwenn, e i annan en *Chair* ki si mon pa tronpe se *Antigua*. E donk sa i annan en kantite bann ennler nou zwenn, nou gete ki nou bann defi. E ki mannyer ansanm nou kapab travay ansanm pou ki nou kapab rezourd pli efikasman sa bann menas.

Donk, an tou ka *one of the main topic* ki *of concern* pou bann ptipti sanzman klimatik aköz nou bann petite zil. E nou vilnerab avek sa bann *climate change*, sa bann delo ki monte tousala *sea rise level and so on*. So, i en keksoz ki vreman enportan aköz i annan en bann *forum* enternasyonal ki mon ti zwenn ki annan bann lasistans ki nou pei i kapab benefisyè. So vwala. Mersi Madanm Onorab.

MADAM CHAIR

Onorab Georges.

HON BERNARD GEORGES

Mesi Madanm Chair. Madanm Chair, mon kestyon pou Mr Belle i en kestyon senp. Mr Belle mon pe demann ou sa kestyon pa koman en travayer Minister *Foreign Affairs*. Me koman Jacques Belle sitwayen prive.

Ki ou pozisyon lo *diaspora* vote dan eleksyon? Premyerman, eski nou krwar ki bann Seselwa ki tanporerman absan ler i annan en eleksyon, swa aköz zot pe travay dan en misyon diplomatik oubyen zot lo tretman oubyen zot pe etidye, oubyen zot menm lo vakans, me zot tanporerman absan zour eleksyon. Eski ou krwar zot devret vote? Atraver en *ballot or early voting*?

E dezyenmman ki ou pozisyon lo bann *diaspora* ki reste permanan an deor Sesel. Eski ou krwar ki zot devret vote dan en eleksyon? Mersi.

MR JACQUES BELLE

Mersi msye Onorab pou ou kestyon. Annefe wi i en bon kestyon. Ki mon pozisyon parey ou konnen mwan mon en diplomat mon pou byensir annan desizyon ki Gouvernman dizour i aplike mon pou respekte, mon pou enplimante.

Me lo nivo *diaspora*, parey ou konnen i pa posib pou lenstan bann *diaspora* vote ki tanporer parey etidyan ki permanan parey bann dimoun ki'n ganny etabli bann rezidan aletranze. Mon krwar ki annefe sa i en kestyon ki mon pou bezwen met dan zot latansyon zot Lasanble Nasyonal, lepep

mon krwar i devret deside petet en *referendum*.

Nou'n war dan lezot pei i annan bann desizyon ki ganny pran lo nivo *referendum*. Zot les lepep regarde ki pozisyon. E i annan serten pei ki permet parey *La France*. I annan bann pei parey mon krwar Moris ki pa pe permet. Me sa se en gran kestyon. En kestyon pou en sanpyon ki ou'n met dan mon vremen ki mon pozisyon.

Be mwan mon krwar se lavolonte *du peuple*. Mwan mon krwar ki aköz i I annan bann dimoun ki ti a voudre osi vote. I annan en bann osi ki dir be non sa bann dimoun zot pa dan pei, zot pa pe kontribye – zot - ou konnen. So, mwan sa kestyon mon prefere met sa dan latansyon lepep, pou zot ava vwar lekel ki meyer desizyon pou fer.

Me *c'est vrai* ki ler ou en etidyan ki ou deor, ki ou'n angaz ou lekor dan en *cursus* liniversiter ou pa pe kapab vin vote. Be amwen si ou vin Sesel. Me vwala se en gran kestyon ki mon krwar ek letan sertenman i pou evolye pou annan bann deba. E lepep i ava deside ki zot panse meyer solisyon. Mersi bokou msye Onorab.

MADAM CHAIR

Bon. Si napa okenn lezot kestyon nou ava dir Mr Belle mersi e eskiz li dan *Chamber*. Nou ava osi sorti dan *Committee Stage*. Bon, nou ava prezan pran bann lentervansyon. Onorab Vidot.

HON AUDREY VIDOT

Mersi Madanm Speaker. Bonzour Madanm Speaker. Tou Manm Onorab. Tou manm piblik ki a lekout. E en bonzour spesyal pou zabitan Roche Caiman. Madanm Speaker, bomaten Lasanble Nasyonal avek pep Seselwa ki a lekout ki pe swiv nou Lasanble in ganny en loportinite pou zot konn enn bann nominasyon pou pozisyon Anbasader.

E sa premye nominasyon se Mr Jacques Belle. En zenn profesyonnel Seselwa ki'n ganny loportinite pou vin devan Lasanble Nasyonal, devan Lepep Seselwa pou li kapab en tradwir son lekor. Byensir in konfirm ek nou ki i en paran e ki i annan en fanmir. E i en zenn i kapab loportinite osi pou li kapab koz en pti pe lo son bagaz ledikasyon e osi son leksperyans travay.

E Seselwa in nobou kapab tann pou zot menm, kot bann Manm atraver bann diferan kestyon pou zot aprofondi zot konesans e teste abilite Mr Belle

pou en pozisyon koman anbasader. E byensir en zenn byen edike avek bokou leksperyans travay dan diplomasi. San dout avek son bagaz legal ki nou'n vwar atraver son CV, lo maritim osi. E osi dan diplomasi, i kapab fer en bon travay pou en pozisyon Anbasader pou reprezant Sesel.

Son nominasyon anba ladministrasyon Prezidan Patrick Herminie i enn ki san dout enspir bokou nou bann zenn espesyalman bann ki pe swiv ki annan en pasyon e devosyon dan en karyer diplomasi.

E son nominasyon i montre valer e langazman ki Prezidan Patrick Herminie avek son ekip i annan pou pare pou elev laspirasyon nou bann zenn profesyonnel Seselwa parey byensir Mr Jacques Belle ki enn parmi bann legzanp nou bann zenn profesyonnel Seselwa ki pe ganny rekonnet pou byensir bann sakrifis e langazman e determinasyon pou akonplir pa zis lo nivo, son nivo akademik, lo nivo ledikasyon.

Me osi dan son parkour travay, langazman e devosyon ki pe montre dan son karyer pou li kapab avans devan dan lavi. San dout mwan mon pou aport mon soutyen, mon sipor pou son nominasyon. E mon a

sezi sa moman pou mwan profite pou swet li tou boner e prosperite. Ki Bondye i a kontinyelman gid li e beni li pa zis dan son lavi familyal. Me osi son karyer e mon demann osi mon bann lezot koleg pou donn sipor pou son nominasyon koman enn nou bann zenn Anbasader. E pou benefis Sesel. Mersi Madanm Speaker.

MADAM SPEAKER

Onorab Monthy.

HON PHILIP MONTHY

Mersi Madanm Speaker. Mon santi i en lobligasyon pou mwan dir detrwa pti mo ozordi lo nominasyon Mr Belle, aköz mon konn tre byen son konpetans. E nou tou nou pou vwar letan nou get son CV ki i en zenn *homme* tre, tre konpetan ki'n pas lamazorite son karyer ziska prezan dan la diplomasi.

Parey mon'n dir taler ler mon'n demann li, mon'n poz li serten kestyon lo nou kolabor dan lepase lo plizyer proze. Mon ti en Manm lo Komisyon Nasyonal *La Francophonie*, ki li osi i ti en manm lo la pou nou sey promouvwar lalang *française* isi Sesel. Son travay avek *l'OIF* mon'n osi lyez avek *l'OIF* ler mon ti kot Lakademi Tourizm lo plizyer proze kot nou ti form bann ansennyan kot zot

ti komans ansenny bann lezot size an *française* olye zis franse koman en matyer.

So, nou'n kolabor lo plizyer proze da lepase. Mon konn son konpetans. E sa ki byen se ki i en zenn ki'n dan la diplomasi. E i pa en dimoun ki'n sorti an deor ki petet pe ganny okenn faver, okenn travay ki in fer pandan eleksyon okenn faver politik i pa tonm dan sa kategori.

I en zenn in la dan *Foreign Affairs*, in ganny plizyer responsabilite. Tou dernyerman mon konnen i ti Paris kot tanzantan ler nou'n kominike mon konnen i pe fer en travay ekselan. Se sa ki ozordi mwan mon santi mon bezwen dir sa detrwa mo aköz i touzour en plezir ler ou vwar en zenn ki'n dedye son karyer dan en domenn. E i pe ganny rekonnet pou li al lo en lot nivo.

Olye ou vwar lezot dimoun an deor ki zanmen in annan okenn relasyon, okenn koneksyon avek sa *field* avek sa domenn ki zot pe al ganny met ladan. E ler sa i arive, i sonn lezot zenn ki dan la diplomasi ki kot *Foreign Affairs* lespwar ki nou kontinyen travay ki ek letan nou grenp lesel. E nou ariv lo sa pli o nivo parey Mr Belle in arive la ozordi.

So, avek sa detrwa mo Madanm Speaker mon santi ki mwan personnelman mon vwar li i en bon nominasyon. I pou fer en travay ekselan, i pou met Sesel a ker dan tou sa ki i fer aköz mwan mon konn li personnelman. Mon konnen son fason travay ler i ganny donner en serten responsabilite ki mannyer i pran sa. E ki mannyer i desarz sa bann responsabilite.

E parey mon'n dir, mon annan zis bann mo lankourazman pou mwan dir ozordi. E mon swet li donn sans dan sa nouvo letap ki i pe al antreprann. E swete ki i kontinyen met Sesel an premye. E fer Sesel fyer. Mersi bokou.

MADAM SPEAKER

Onorab Aglae.

HON EGBERT AGLAE

Mersi Madanm Speaker. Mon a dir bonzour tou bann Manm Onorab. E tou dimoun ki a lekout. Ankor enn fwa Madanm Speaker, nou war en zenn ki vremen aspiran. Ki in ganny propoze, nomen par Prezidan Larepiblik pou li pran en pos Anbasader ki dayer Mr Belle li in annan en karyer dan la diplomasi.

I annan en parol ki Mr Belle la devan dan son *interview*

in dir. sa se i pe ankouraz e menm regrete ki son bann zenn. Mon mazine bann ki'n komans par diplomasi dan son letan ki in *give up* dan en sans. E in lans en lapel dan en sans pou zot kapab reste dan zot profesyon mon kapab dir.

E letan mon regard sa karyer diplomasi byensir i annan diferan nivo ki bann diplomat i pas atraver. Diferan staz ziska ler ou pou ariv koman en anbasader. E kontyen, mon met li koumsa nou touzour bezwen annan sa balans zenn e osi sa ki aze ki tradwir koman zenn mon get li koman sa lenerzi. E sa ki aze koman sa leksperyans.

Nou pou touzour bezwen sa kalite balans dan nenport ki sekter, nenport ki Minister, Gouvernman, *department name it* menm sekter prive. E parfwa i pa fasil pou kre sa balans, mon konnen sa. Menm isi dan Lasanble. Menm atraver parti politik. Me selman ou bezwen touzour pe gard lespwar pou kit en laport ouver pou ki sa balans i kontinyen *nurture* dan en sans. Akoz nou bann zenn i bezwen bouz de lavan.

Me osi zot bezwen gidans ek leksperyans sa ki pli aze. Letan mon'n osi ekout Mr Belle koze. E mon konvenki ki sa leksperyans, kalifikasyon ki li i

annan i pou fer li vin en bon Anbasader mon kapab dir. E si zanmen i pou ganny poste *La France*, akoz in fer bokou son letid *La France*.

In menm pran pos *chargé d'affaires* laba. I ava kapab osi anmenn sa lenerzi ki nou bezwen par egzantp nou annan nou Komisyon Losean Endyen ki i annan en konotasyon franse par deryer li. E i annan bann sipor finansyel franse ki donn Komisyon Losean Endyen, ki i ava li. E i ava osi ede pou pous bann dosye, pou ki Sesel i kontinyen benefisyé aköz nou annan en akter dan sa komisyon nou osi. Nou'n pran presedans a plizyer repriz.

E osi nou pe regard nou Sekter Tourism ki en bon poursantaz nou touris ki vin Sesel i bann Eropeen e plizyer Franse anvi ki nou osi nou en nasyon kolonizater *La France*. E mon santi i ava kapab pouse pou ki ava devlop plis sa relasyon. E osi amelyor sa kolektivite ki nou bezwen koman en pei fas atraver bann demann ki annan la deor, ki dayer dan lepase ti annan.

Me ozordi i nepli. E i annan en demann atraver Sekter Touris pou etabli bann lyen direk ki kapab anmenn nou bann viziter pou vin Sesel. E mon napa okenn dout poudir

i kapab avans sa bann dosye bilateral, multilateral ki Sesel i ava kapab benefisye ladan.

E ou'n osi fer en mansyon ki size letan in koz lo donn sans. Mon krwar i enportan sa size rotasyon bann Anbasader, *ok*. E sa i pou ede donn bann ki'n ganny apwente me ki ankor lokal e si i pou travay lokal pou ranplas bann lezot. E osi bann ki'n ale pou retournen, in regard en pti gin pei, parski letan ou'n fer 3an/4an dan en pei konteks, pei i sanze li i dinamik.

So, sa osi i ava ede donn lespwar bann ki la pou kapab ale. E osi bann ki pe aspiran pou pran bann pos Premye/Dezyenm Sekreter dan Lanbasad osi pou zot kontinyen donnen. E ki demen osi zot osi zot ava annan en pos koman en Lanbasader. Byensir nou pou annan serten limitasyon aköz nou napa lanbasad dan tou pei, nou pa pou kapab *afford* osi.

Me selman i ava donn zot en lespwar pou ki demen dan lefitir zot annan bann posibilite pou zot pran sa bann pozisyon apre ki zot in ganny leksperyans e kalifikasyon nesaser. So, Madanm Speaker, mon napa okenn dout ki Mr Belle pou ganny tou nou sipor pou li kapab ganny apwente Anbasader. Mersi.

MADAM SPEAKER

Onorab Woodcock.

HON WAVEL WOODCOCK

Mersi Madanm Speaker. Madanm Speaker, ozordi bomaten ler nou pe konsider sa nominasyon Mr Jacques Belle pou vin Anbasader. Mon bezwen dir poudir ozordi nou pe war en zenn egzampler. Mr Belle i en legzanp en dimoun ki'n travay dir parey in apel son lekor en *career diplomat*.

En dimoun ki a en tre zenn az in komans son karyer dan *Foreign Affairs* koman en *Second Secretary* pou *Legal Affairs* dan Seksyon *Foreign Affairs* i montre rezilta travay dir. E nou vwar sa progresyon, en dimoun ki'n akimil leksperyans koman en diplomat. In bouze, in progrese, in pran plizyer pozisyon o nivo lokal, lo nivo enternasyonal. In *chargé d'affaires* Lanbasad *La France*. In *Minister-Counsellor* osi *La France*.

In menm pran bann pozisyon enportan anba *Foreign Affairs* koman direkter zeneral *Foreign Affairs* e enn bann dimoun ki'n fer en travay serye pou setup sa *unit* pou bann *diaspora*, bann Seselwa ki ep reste aletranze. Son lapwentman i en keksoz ki nou

merit rekonnet, aköz i pa en lapwentman dapre faver ouswa en lapwentman pou rezon politik ouswa i pe ganny apwente petet as en rekonpans pou al retrete dan en pei aletranze.

Me i en lapwentman en dimoun konpetan. En dimoun ki'n travay pou li prouv son lekor ki'n monte ki'n komans anba. In travay in monte e in ariv sa nivo kot i ete ozordi. Parey mon'n dir Mr Belle, i en dimoun vreman, vreman edike. Annefe ou kapab dir mon krwar i en lafyerte osi pou nou Lasanble Nasyonal, aköz i garson enn nou former *MNA* Mr Daniel Belle.

So, ou konnen nou bezwen rekonnet e apresye ler nou war en zenn ki'n prouv son lekor ki'n ariv sa nivo ozordi. Son konpetans, son ledikasyon i montre dan domenn maritim e dan plizyer domenn atraver bann pozisyon ki in pran dan lepase. Mwan mon krwar i en keksoz ki nou bezwen ankouraze.

I en keksoz ki mon bezwen dir se ki tou ladministrasyon i relevan. Dan lepase ladministrasyon avan e bann ki'n la depi lontan in toultan enportan, *even* si ladministrasyon i sanze pou

nou rekonnet konpetans e rekonnet travay dir.

Parey mon'n dir in komans anba en ladministrasyon. In kontinyen travay anba en lot ladministrasyon, in kontinyen progrese in ariv en nivo. E la ozordi i son letan in arive pou li mont en lot nivo. e sa i lafason ki mon santi nou bezwen kontinyen ankouraz sirtou bann zenn *diploma*.

Onorab Egbert Aglae in fer resorti en *statement* annefe ki in Mr Belle ti fer regarde en pe sagrinasyon ki annan ki bann ki'n komans dan sa semen *as* bann diplomat. Me selman zot in arete, zot pa'n kontinyen sa larout. E li in anvoy en lapel pou bann lezot zenn. E mon osi mon annan en lapel pou kontinyen fer avek Gouvernman dizour e ladministrasyon ki pou vini dan le fitir pou nou kontinyen rekonnet e met divan anba lezel bann zenn pou zot kontinyen monte e al pli o.

Sanmenm sa rezon ki ozordi mwan mon pou dir senserman ki mon napa okenn *issue* avek nominasyon Mr Belle pou vin en anbasader, aköz in prouv son lekor i annan sa konpetans. E mon krwar ki Lasanble Nasyonal an antye nou rekonnet ki sa garson Msye

Belle i merite. Mersi Madanm Speaker.

MADAM SPEAKER

Mersi. Onorab Gill.

HON CHURCHILL GILL

Mersi Madanm Speaker. Madanm Speaker i en gran plezir pou Sesel, koman en pei ler ki en zenn ki parey nou'n dir "*burn the midnight candle*". In pourswiv son letid avek bokou serye. E nou tou nou vwar atraver son CV ki i en zenn ki ti annan en *commitment* vreman serye. I ti konnen ki i anvi dan son lavi. E i kler ki son nominasyon i pa'n vin koman en sirpriz.

E en lot keksoz ki kler ankor, i kler ki Prezidan Larepiblik i annan en gran vizyon pou lazenes Seselwa ki konpetan. Sesel pe vreman fer en travay serye pou ki nou pei i bouz lo sa lot nivo ler nou vwar konpetans pe ganny met ansanm.

E ki bann dimoun ki pou al reprezant nou aletranze zot byen ekilibre avek kapasite. E sa i montre nou poudir Sesel pe bouz lo en lot nivo, dan tou son lanplè. Madanm Speaker, selman i annan en keksoz ki fodre i enportan pep Seselwa i konnen laba deor.

Napa okenn lapwentman ki en faver. Tou dimoun i annan son kapasite dan son prop fason. Si en dimoun in ganny apwente, i napa naryen pou fer ek faver. E sa akòz sa dimoun i annan son merit pou li ganny apwente. Fodre pa toultan nou kategoriz dimoun, tou sa bann dimoun ki vin devan zot in swiv menm prosedir. Zot osi zot in fer zot letid ki zot in fer.

Alors, zot *deserves* pou ganny respe. E nou pa kapab la anndan krwar poudir si en dimoun i vin prezant son lekor pou nou kestyonn li, pou nou koz ek li. Toultan nou bezwen asosye li ek en faver. I enportan ki nou donn respe sak Seselwa ki ganny son loportinite.

E pou Mr Belle, i kler ki san okenn dout nou pou vwar retonbe donner son kapasite. E son kantite lannen ki dan *Foreign Affairs*, i kler ki i deza annan labaz. E prezan i en *matter* pou li bouz pli o, e kontribye pou son pei lo en lot nivo. E mwan lo mon kote mon pou donn li tou sipor nesaser, akòz mon krwar i merite e sa desizyon ki Prezidan Larepiblik in pran pou nomin li, i en desizyon ki byen merite. Mersi Mr Speaker.

MADAM SPEAKER

Mersi. En dernyen enterven an avan *right of reply*. Onorab Georges.

HON BERNARD GEORGES

Mersi Madanm Speaker. Mersi Madanm Speaker. mersi osi Madanm Speaker pou ou leklersisman bomaten lo sa size Komisyon Lanket lo Lasonpsyon. Mon krwar ti neser pou eklersi sa. E ou'n dir ki i pa ti annan okenn lobligasyon pou sa zafer vin devan Lasanble.

Annefe, i pa'n vin devan Lasanble. E sa *statement* ki Lasanble in aprouv sa Komisyon i napa fondman. Mon remersye ou pou lefe ki ou'n pran sa pozisyon bomaten. Madanm Speaker, lo size Mr Belle mon konn son paran pa ki lefe mon konn son paran i fer li neserman vin en bon diplomat. Me mon krwar i sorti dan en fanmir ki byen onnet, stab.

Annefe, son papa ek mwan nou ti asiz lo menm ban lekòl. Donk, mon annan en serten koneksyon si ou anvi dan sa fason avek sa zenn *homme*. Mon salye progresyon bann karyer diplomat. E sa se pozisyon ki nou kote sa Lasanble nou pran tel parey detwa lannen pase, nou ti nou ladministrasyon ti fer menm

zafer avek Lanbasader Racombo ek Lanbasader Moumou ki ti 2 zenn ki ti sorti dan la diplomasi. E ki ti ganny sans pou progresse.

La sa fwa si, lasans in tonm lo Mr Belle. E i ava fer son karyer, e mon sir ki bann ki'n vin avan li, e bann ki pou vin apre li antan ki en karyer diplomat i pou travay onnetman e dan lentere nasyonal. Mon en pe regrete ki in fer en fason pou li pa reponn mon kekyon bomaten. Mon ti a'n kontan konn lopinyon sa zenn *homme* lo en size enteresan kontrovers, difisil.

E se pou sa rezon ki mon'n demann li sa kekyon. Me in prefere donn mwan en repons ki mon ava kategoriz koman en repons diplomatik. In reponn san reponn, e mon sipoze se sa ki pou fer li vin en bon diplomat. Madanm Speaker, mon'n pran laparol bomaten senpleman pou mwan dir ki lo nou kote nou kontan vwar progresyon bann travayer dan Minister *Foreign Affairs* koman bann *career* diplomat ki monte. Sakenn son tour i vini, ler in ariv staz kot i bezwen progresse i ava progresse.

Nou pa tro an faver parey toultan nou'n plito kontan promot travayer Minister Zafer Etranzer, olye bann *reward* pou

en lapartenans kelkonk dan en politik kelkonk. Me sa i pa leka la. E donk, pou sa enn diplomat ki'n vin devan nou la ozordi, mon swet li le meyer si Lasanble i deside pou aprouv li bomaten. Mersi Madanm Speaker.

MADAM SPEAKER

Mersi Onorab Georges. Onorab Lemiel.

HON SYLVANNE LEMIEL

Mersi Madanm Speaker. Madanm Speaker, premyerman enn mon ti a kontan remersye tou bann Manm ki'n entervenir atraver demann kestyon, atraver koz lo Mosyon. E devan nou ozordi mon osi mon pou azoute ki nou'n vwar en zenn *homme* avek bokou kapasite.

En msye tre edike e ki annan bokou leksperyans li menm dan la diplomasi. E si Prezidan in arive nomin li pou li kapab pran en pozisyon koman Anbasader, i vedir ki i en dimoun ki annan sa konpetans. E i pou kapab desarz sa responsabilite. Etan donner osi letan nou regarde ki son travay aktyel, ki en *Minister-Counselor* dan Lanbasad Sesel Paris, *La France* i deza pe fer bokou travay pou Sesel dan sa Lanbasad.

Alors, pou nomin li pou li vin en Anbasader Madanm

Speaker, mon krwar ki Prezidan in fer en bon swa. Gouvernman in fer en bon swa. E alors mon ti a kontan demann avek tou mon bann koleg Manm Onorab pou nou aprouv nominasyon Mr Jacques Francois Eugene Belle koman Anbasader *Extraordinary and Plenipotentiary*, pou Repiblik Sesel. Mersi.

MADAM SPEAKER

Mersi. Nou'n ariv ler pou pran vot lo Mosyon. *In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr Jacques Francois Eugene Belle as Ambassador Extraordinary and Plenipotentiary of the Republic of Seychelles.*

Tou Manm ki aprouv Mosyon? Mersi. Okenn Manm ki kont? Mersi. Mon annan vot i 29 Manm ki'n vot pour e 2 ki'n *abstain*. Nou ava prezan pran en *break* ziska 11er.

(BREAK)

MADAM SPEAKER

Bon, nou ava bouz lo dezyenm Mosyon lo nou lalis pou ozordi. Onorab Lemiel.

HON SYLVANNE LEMIEL

Mersi Madanm Speaker. *In accordance with Article 63(1) and 64 (1) of the Constitution, the National Assembly approves the proposed appointment by the President of the Republic of Mr. Terry Romain as Ambassador Extraordinary and Plenipotentiary of the Republic of Seychelles. Thank you.*

MADAM SPEAKER

Onorab Vidot?

HON AUDREY VIDOT

Motion seconded, Madanm Speaker.

MADAM CHAIR

Mersi. Nou ava aprezan al dan *Committee Stage*. E nou ava resevwar Mr Romain. Bonzour Mr Terry Romain. Mon ava demann ou pou fer en prezantasyon pou bann Manm.

MR TERRY ROMAIN

Madanm Chair. Onorab *Leader* Lopozisyon. Onorab *Leader* Zafer Gouvernman. Tou Manm Onorab dan Lasanble bonzour.

Mon apel Terry Romain. Mon'n grandi Corgate Estate apre Foret Noire dan Distrik Mont Fleuri. Mon'n lekol primer e segonder Mont Fleuri. Mon'n fer 2an aletranze answit retourn Sesel kot mon'n konplet 1an NYS Port Launay.

Apré sa mon'n al Polytechnic *Humanities and Science* kot mon'n fer *A Level History*, Angle Literatir, ek *Economics*. Se preski a lafen mon dernyen lannen *Polytechnic* ki mon ti al ekout en *careers talk* fer par en group zofisye Zafer Etranzer ki mon lentere dan sa domenn ti komanse.

An 1998, mon ti reponn en *vacancy* kot Minister Zafer Etranzer. E answit fer *interview*, e ganny anploye koman en *Trainee Protocol Officer*. E mon karyer dan la diplomasi ti komanse. Biro Protokol parey zot tou zot konnen i annan responsabilite pou plan, e kordinen tou bann levennman ek vizit o nivo Sesel.

E osi responsab pou kordin bann privez ek iminite ki bann Diplomat etranze i benefisye kan zot Sesel. I osi travay etrwatman avek bann lezot partner aletranze pou kordin bann vizit ki Prezidan, Vis-Prezidan ouswa Minis Zafer Etranzer i fer aletranze. Apré 2an koman en Zofisye *Training Protocol*, mon ti ganny labours pou en degre dan *Economic and Business Science Hungary*.

Apré sa ler mon'n retourn Sesel pou travay koman en *Economics*, sa *unit* ki ti kot Minister Zafer Etranzer ti'n

bouz anba Minister *Economic Planning* ek Lanplwa. Alors, mon ti ganny transfer kot Departman *Economic, Planning*. Pa bokou letan apre, *unit economic* ki ti'n transfer kot Minister *Planning* ek Lanplwa ti retourn *Maison Quéau de Quinssy* ki sa letan ti apel Minister Zafer Etranzer ek lentegrasyon Rezyonal.

Alors, mon ti anploye ankor par *Foreign Affairs*. Pa bokou letan apre, Minis ti propoze ki mon al pran sarz Biro Protokol dan pozisyon Direkter Protokol ki ti *vacant* sa letan. Nou'n fer en pe negosyasyon, e nou ti agrer ki mon pou pran sa pozisyon pou selman 2an. E apre mon pou retourn dan Divizyon Lentegrasyon Rezyonal.

Sa ki'n arive apre 2an koman Direkter Protokol, mon'n troun Divizyon Lentegrasyon Rezyonal pou 3an koman *Principal Economist*. Sa letan enn bann travay prensipal sa divizyon sete pou reprezant Sesel dan bann negosyasyon pou *Economic Partnership Agreement* ant bann pei ACP avek Linyon Eropeen.

Mon premye *posting* ti an Septanm 2012. Mon'n fer 3an edmi *Abu Dhabi* ziska Mars 2016. E laba mon'n ganny mon premye apersi louvraz en

diplomat an deor mon pei. Mon fonksyon ti bokou konsiler, e in osi mon'n ganny bann nouvo leksperyans par egzanp la premye fwa ki Sesel ti fer en premye *SOME* Enternasyonal lo Lekonomi Ble ki ti annan *Abu Dhabi* an 2014.

Sa ti en kolaborasyon ant Sesel avek *UAE*. E mon ti travay tre pre avek bann Zofisye Zafer Etranzer sa pei, pou asir sikse nou levennman. Mon rapel byen sa letan 2014 Lekonomi Ble ti ankor en konsep. E bann travay pratik soutenab pou servi resours lamarin avek proteksyon nou *zone* maritim pa ti ankor vin en parey konmela en trend mondyal.

An 2016, mon ti *rotate back to Headquarters* e mon'n pran plas Director dan Divizyon Lentegrasyon Rezyonal. An Mars 2017, mon ti vin travay dan Sekretarya Speaker Lasanble Nasyonal koman *PA Mr Speaker*. Mon kapab dir ki mon'n kontan bokou mon letan kot Lasanble Nasyonal, kot mon'n aprann lo tou travay Lasanble pa zis sa ki li ki war lo *TV*.

Mon'n deservi koman *Committee Clerk IAC, Committee Clerk TRNUC, Assistant Committee Clerk Committee Anti-Viktimizasyon*. E mon'n osi *Desk officer* pou *SADC-PF, AC-*

*JOINT Parliamentary Assembly
ek Pan-African Parliament.*

An Avril 2018, mon ti retourn dan Minister Zafer etranzer pou en dezyenm *posting* koman *Principal Counsellor* kot Lanbasad Sesel, Lonn, Langleter. Mon'n dan sa pozisyon pou 4an edmi. Lonn i landrwa kot *headquarters Commonwealth IMO* i baze. Alors, mon'n travay bokou koman en kondwit sa 2 lorganizasyon.

Lonn i osi landrwa ki annan plis *diaspora* Seselwa. Alors, mon'n travay Konsiler i en pe bokou laba. Mon'n retourn Sesel an Septanm 2022, me enn de mwan apre mon ti ganny demande pou retourn *Abu Dhabi* en dezyenm fwa sa voyaz pou 9 mwan pou *oversee* Lanbasad pandan ki Lanbasader avan ti'n retire. E nouvo pa ti ankor pare pou monte.

So, se an Oktob 2023 ki mon'n retourn *headquarters* pou asir rol ki mon ladan an se moman, sa i *Chief of Protocol*. Vwala an bref mon karyer 26an dan la diplomasi. Avan terminen, mon oule remersi Prezidan Larepiblik pou mon nominasyon. Mon remersi Sekreter Prensipal Zafer etranzer pou zot gidans. Mon osi oule remersi tou fanmir e

zanmi ek koleg ki'n siport mwan dan mon parkour. Mersi Madanm Chair.

MADAM CHAIR

Mersi. Mon ava aprezan pran bann kestyon. Onorab Roucou.

HON MICHEL ROUCOU

Mersi Madanm Chair. Bonzour tou dimoun. Bonzour Mr Romain, en zanfani Mont Fleuri. I osi en zanmi pou mwan. Mr Romain, si ou kapab dir avek bann zenn la deor, e nou konn ou parkour en pti pe ki mannyer ou'n pase parey ou'n dir.

Ki lankourazman ou kapab donn ek bann zenn ki zot osi demen zot ti a voudre pou war zot apre ki zot in antre dan en lanplwa, e pou zot kapab bouz lo en lot nivo li menm li. Ki bann lankourazman ou kapab donn zot? Mersi.

MR TERRY ROMAIN

Mersi Onroab. Well, mwan menm mwan mon lankourazman or mon premye apersi ti vin parey mon'n dir ler mon ti *Polytechnic* menm ler mon ti war mon ti swiv en *Careers Week*. So, mon ti ganny en pe nide oubyen ki sa louvraz i *entail* or ki mon ekspekte i fer dan la diplomasi.

E osi mon ti koz akòz ti annan zenn sa letan osi ki ti menm swiv sa *careers talk*, mon ti koz ek zot. E zot menm zot ti pe ankouraz mwan poudir mwan sa i bann *prospect* ki annan. I bann keksoz ki dapre kekfwà ou *skill set* ki ou annan, ou kapab fer.

So, pou en zenn ki anvè antre dan la diplomasi i parey nenport louvraz osi. Ou swiv konsey, gidans e ou annan pasyans, e ou travay dir. I parey dan nenport louvraz. E ou esper ou tour. Mersi Onorab.

MADAM CHAIR

Onorab Lepathy.

HON NELSIA LEPATHY

Mersi Madanm Chair. Bonzour Mr Romain. Mon oule premyèman felisit ou dan ou nominasyon koman en Anbasader. Avek ou lorizin dan planifikasyon ekonomik ek lentegrasyon rezyonal. Ki stratezi ou pou servi pou ou promouvwar lèntèr lekonomi Sesel aletranze? Mersi Madanm Chair.

MR TERRY ROMAIN

Mersi Onorab. Sesel i deza pe travay avek bokou bann groupman, sirtou bann groupman multilateral pou

kapab promot *trade* ki ou ti pe dir? Aletranze?

E nou deza dan bann groupman par egzanp COMESA e SADC. Nou deza dan en groupman ACP-EU ki pe negosye avek i pou en nouvo IPA. E stratezi se touzour rod benefis plis ki nou kapab benefisye avek. Mersi.

MADAM CHAIR

Onorab Vidot.

HON AUDREY VIDOT

Mersi Madanm Chair. Bonzour Mr Romain. Felisitasyon pou ou nominasyon. Mr Romain koman en zenn ki'n dan parkour ou karyer ou'n pas anba diferan ladministrasyon. E mon ti a kontan ou dir nou petet pou aspir bann lezot zenn profèsyonnel pe enport ki pozisyon ou ete dan servis piblik, dan Gouvènmàn, ki ou met priyorite ou langazman travay. Petet partaz avek zot en pti an bref, ki ou kapab ankouraz bann lezot zenn ki dan bann pozisyon servis piblik pour ki pe enport ki en ladministrasyon ki la, ou angaje pou ou kapab fer sa diferans ki ozordi ou vwar i pe aporti fri ki ou'n ganny nominen koman Anbasader ler ou'n donn tou dan ou domenn travay. Mersi.

MR TERRY ROMAIN

Mersi Onorab. Mon *advice* se pou ou travay avek lentegrite, sa i pou limero 1. Akoz parfwa wi i pou difisil, i pou annan bann presyon ki ganny mete. Me selman *as long* ki toultan ou pe travay avek lentegrite ki ou konnen ou pe swiv Polisi ki an plas. Ou swiv direktiv ki manner ou travay i devret ganny fer.

Ou pou travay avek nenport Gouvernman dizour, akoz si ou en *civil servant* ou la pou enplimant Polisi ki sa Gouvernman in mete. E alor, *as long* ki ou pe travay avek lentegrite ou pou kapab, menm si ou pe swiv me selman ou pe fer li avek lentegrite. E ou eksplik ou pozisyon. E mon krwar ki tou keksoz i swiv koumsa. Mersi.

MADAM CHAIR

Mersi. Eski nou annan ankore lezot kestyon? Onorab Gill.

HON CHURCHILL GILL

Mersi Madanm Chair. Bonzour Mr Romain. Felisitasyon pou ou nominasyon. Ler mon pe get ou CV i annan a en serten moman donnen ou ti *Principal Economist*. E parey ou konnen Sesel in siny bokou lakor e menm si petet ou pa'n prezan

dan sa bann sinyatir. Selman ler sa bann sinyatir normalman i fini, i dekoul dan *Foreign Affairs*.

Son bann konteni, son bann diferan fason ki nou bezwen dil avek sa bann lakor koman en pei. Me selman i annan bokou ki parfwa menm si nou sinyen i koz serten *challenge* pou nou *given* nou groser oubyen nou kapasite ekonomik. I annan serten keksoz ki petet i tant pou restrikt lo en pe.

Dan ou lapwentman ki la ou'n ganny nominen enn fwa ki ou'n fini ganny apwente dan ou post. Eski kot ou ganny poste si i en landrwa kot i annan serten sa bann rapor pou la dan ou biro, ki ou pou bezwen dil avek ou pou osi pran kont petet la in ariv en letan kot sa bann diferan lakour ki nou'n sinyen petet vwar bann konteni dan sa rapor ki petet pou Sesel i koz serten *challenge to certain extent*.

I pa vadir i anpes nou fonksyonnen. Me selman kekfw i annan serten bann pti keksoz petet ki ozordi i devret ganny aziste, konpare ler i ti ganny sinyen sa letan.

Eski ou krwar sa i en keksoz ki ou pou donn latansyon dan ou biro si i annan sa bann lakor ki tonm

anba ou lofis kot ou ete, pou zisteman fer li vin pli azour avek bezwen Sesel. Ozordi pou nou kapab pli byen apresye oubyen benefisye avek sa bann lakor pardon ki nou'n sinyen pou Sesel ki pou tonm kot ou lofis si i annan ? Mersi.

MR TERRY ROMAIN

Mersi Onorab. So, *Foreign Affairs* i plito dan la diplomasi nou bann lakor ki nou sinyen, nou form par dan negosyasyon. Wi, i nou devwar osi pou met bann pei bann lorganizasyon nou pe al rode kote ki annan bann benefis.

Me pou lenplimantasyon i plito bann MDAs bann lezot... preski tou lakor ki sinyen i annan en lot Minister oubyen departman ki li i *involve* avek lenplimantasyon si i annan pou fer avek Lasante e Ledikasyon nenport lot. E wi *Foreign Affairs* parfwa nou war nou bezwen *chase up* bann keksoz ki'n sinyen pou gete si i ganny enplimante.

I annan serten pei par egzanp ki nou annan en *joint commission*, ki *periodically* nou revwar nou *meet* ankor avek sa bann pei bann zofisye sa pei pou gete kote nou ete avek sa tel, tel lakor lo son lenplimantasyon. Si i annan bann *pick falls* oubyen i annan

bann lanpesman, ki mannyer nou kapab aranze lo kote nivo teknik.

E osi bann lakor laplipar i annan en peryod lenplimantasyon oubyen i annan en peryod ki bezwen revwar parey lakor lapes nou konnen i annan sa ki tou le 5an i renouvle. E ki nou andete avek sityasyon a sa moman. E ki sa i nou letan pou kapab fer sanzman dan serten lakor.

I annan ki pou bokou plis letan wi, i annan ki mwens. Me selman i osi depan lo nou kapasite osi nou *human capacity* pou nou kapab fer negosyasyon, pou kapab ganny *the best* sityasyon. Me sa enn ki mwen *painful* pou nou i annan serten keksoz ki nou swiv. Me selman pou nou i vin difisil. E i depan lo nou kapasite pou negosye osi. Mersi Onorab.

MADAM CHAIR

Onorab Trevor Louise.

HON TREVOR LOUISE

Mersi Madanm Chair. Bonzour Mr Romain. Felisitasyon lo ou nominasyon. Mon kestyon pou ou se avek ou leksperyans dan *Foreign Affairs*, ensi dan bann *posting* ki ou'n ganny sans fer enternasyonalman ki bann *challenges* ki ou pou dir ki

koman sa bann lanbasad nou lanbasad i fer fas avek.

E an term bann *priority areas* apriyori lekel ki ou santi i merit plis latansyon an se moman? Mersi.

MR TERRY ROMAIN

Mersi Onorab. *Well*, pou bann pti Leta Zil en pei parey Sesel ki nou ptipti nou resours i limite. Pli gran *challenge* i *actually* finans. E sa i zwe en rol lo ki grander Lanbasad i kapab ete. I annan bokou pei la an se moman ki en *one man show*.

E sa bann Anbasader ki laba, sa diplomat i pe war li ki i pe *attend to* tou bann demann bann legzizans ki annan dan sa stasyon kot i ete. E i pe travay, i bezwen delivre *attend to* en keksoz ki parey enn ki annan douzenn, senkantenn bokou plis dimoun ki laba. Parey ler mon ti Langleter, mon rapel sa ti aköz *COVID* osi nou ti bezwen fer arete drayver. Redwir size lofis, Langleter ti ansanm ki i ti ansanm avek *Tourism*. Ferm Lofis *Tourism*, sa ti arive pou Sesel. Ti zis en *one man show*. Mwan avek en *office manager*.

E sa i en gran *challenge* pou nou aköz, me selman ki nou servi vi ki nou dir nou resours i limite vi ki nou napa sa *economist scale* ki lezot i annan, *then* nou bezwen *make*

the best use of sa ki la. Nou swazir kwa ki pli enportan dan nou priyorite. *And* parey la ou'n demande osi ki nou priyorite.

Enn nou priyorite la i parey nou'n war i Minister Zafer Etranzer la i apel *diaspora*. Se angaz plis nou bann *diaspora*, zot en resours enorm. I annan dan bokou pei Langleter i sipoze annan sa pli gran group. E aköz zot annan en kantite ki zot kapab kontribye dapre zot resours isi Sesel oubyen zot bann lekspertiz ki zot kapab swa vin isi retournen an servan teknolozi pou pli *involve* dan bann keksoz spesifik teknik ki annan isi. Mersi Onorab.

MADAM CHAIR

Onorab Georges.

HON BERNARD GEORGES

Mersi Madanm Chair. Bonzour Mr Romain. Mr Romain Sesel i annan en pozisyon lo *deep sea mining*. Lekonomi Ble in fer kler ki nou pozisyon Sesel. Mwan mon ti a kontan konn ou pozisyon. Eski ou an faver ki *deep sea mining* i arive dan fon lanmer dan nou teritwar ek dan nou *EEZ* oubyen ou kont? Mersi.

MR TERRY ROMAIN

Ok. Sesel an se moman nou *Marine Protected Area* in sot 30

poursan. 30 poursan nou *EEZ* ki sa i laspirasyon pou lemonn antye, ki kantite proteksyon pou nou lanmer. E sertenman dan bann landrwa ki i retonm dan bann landrwa 100 poursan proteze, mon krwar sipoze annan 0 leksportasyon *any sort of* eksportasyon.

Me bann lezot landrwa ki pa tonm dan sa 30poursan i annan en, i annan bann *expert* ki dan sa *field* in mete kwa ki nou kapab fer e kwa ki nou pa kapab fer dan sa bann rezyon koumsa. E alors mon krwar ki nou swiv sa ki bann *expert* i dir nou lo sa size. Mon a defann sa si ler mon baze aletranze. Mersi Onorab.

MADAM CHAIR

Onorab Labonte.

HON ANDY LABONTE

Mersi Madanm Speaker. Byenveni Mr Romain. Bomaten nou'n war en zenn Mr Belle ki osi i annan gran leksperyans dan diplomasi. Petet mon kestyon i vize, ki lespwar e petet lankourazman ou donn bann endividi ki zot in devoue pou plizyer letan dan la diplomasi.

E petet par ler zot santi ki zot pa pe ganny valorize. E ozordi ki pe mont lo en lot nivo. So, ki lespwar ki ou annan pou ou donn zot ou mye. Petet en

mo lankourazman pou dir zot pou zot kapab kontinyen, aköz nou war ki lenportans ki la diplomasi i anmennen dan nou pei. Mersi.

MR TERRY ROMAIN

Mersi Onorab. Ki lespwar ki zot annan parey zot war mwan ozordi. parey mon'n dir dan mon *statement* mon karyer 26an, 26an dan la diplomasi. E sa mon krwar dan nenport karyer, mon pa konnen si i annan en kantite letan pa bokou letan. Me selman mon'n pran pasyans.

Petet i pa en keksoz ki mon ti pe *look towards*. *Actually*, i vre i pa en keksoz ki mon ti pe *look forward* pou sa kantite letan. Me apre avek leksperyans avek nou bann *exposure* ki mon annan mon war semen pe lead dan sa direksyon. Alor, nenport dimoun ki nou a dir ki lespwar se kontinyen fer son louvraz, kontinyen travay dir avek lentegrite. E i annan lespwar pou tou dimoun. *Thank you*. Mersi Onorab.

MADAM CHAIR

Onorab Sandra Sultan.

HON SANDRA SULTAN

Mersi Madanm Speaker. Bonzour Mr Romain. Mwan

mon ti a kontan konnen kwa ki'n enspir pou ou swiv en karyer diplomatik e aksepte sa nominasyon? Mersi.

MR TERRY ROMAIN

Mersi Onorab. *Well*, depi ler mon ti dan *A Level* kontan sa domenn ti komans par sa *talk*. Mon krwar i enportan ki la mon *Chief of Protocol*, mon ansarz *Public Diplomacy*. Nou kontinyen *actually* nou toultan kontinyen. E bann zofisye i ale dan bann lekol e menm dan bann landrwa travay.

Me sirtou lekol en, *UNISEY* oubyen *A Level* akòz sa ki ti komanse pou mwan. E mon bezwen dir osi sa letan ti annan en kolej lekol Jean-Paul Adam, li i ti dir mwan ki sa i en landrwa ki fodre mon vini, vin travay. Akòz li in komanse laba, e i war poudir nou annan sa *skill sets* sa karakter pou travay dan la diplomatik. E sa ki'n fer mwan kontinyen. Mersi.

MADAM CHAIR

Onorab Grandcourt.

HON ALVIN GRANDCOURT

Bonzour Madanm Speaker. Bonzour tou dimoun a lekout. Tou Manm Onorab. *Right*. Mon kestyon i ler nou get ou CV nou war ki ou'n konmsi annan leksperyans dan Diplomasi

Parlmanter. E mon ti a kontan demann ou ki mannyer ou dan ou karyer la ou pe mazine pou ou adres e siport *Parliamentary Diplomacy*? Mersi.

Mersi Onorab. Wi, pandan sa 1an. 1an ki mon ti travay isi kot Lasanble e *actually* Lasanble ti servi mon bann *skills* e leksperyans sorti kot *Foreign Affairs* pou mwan travay lo bann Komite ki isi kot Lasanble parey IAC. E apre mon'n lo SADC PF koman sekreter and lo *Joint Parliamentary Assembly*.

Ler mon ti Langleter *actually* mon'n kontinyen en tre close kolaborasyon avek Lasanble, akòz ler bann parlmanter par egzanp ti Langleter bann *meeting Commonwealth* oubyen bann *training* in toultan kontinyen akey zot e rankontre zot.

E nou'n toultan gard en bon *actually* en bon relasyon avek Lasanble Nasyonal. E... mon'n perdi en pe ou kestyon la. Wi. *Well* i en kontinyasyon *what is already be*. Nou ti pe fer. *Ok*. Mersi Onorab menm si mon'n bliy en pe.

MADAM CHAIR

Onorab Lemiel.

HON SYLVANNE LEMIEL

Mersi Madanm Chair. Madanm Chair, i annan en keksoz ki mwan mon ti a voudre Mr Romain petet i donn nou serten lenformasyon lo la. Etan donner i swiv dan menm laliny avek lo kote bann Komite ki nou annan dan Parlman.

E sirtou bann Komite Enternasyonal parey ou Mr Romain ou'n nonmen, ki ou'n travay avek. Ou'n travay isi dan Lasanble, ou'n travay avek Komite SADC PF, ou'n travay avek *Pan African Parliament*. Mwan koman en *past member of Pan-African Parliament* Madanm Speaker, i annan bann Komite ki nou lo la dan Parlman *Pan-African* ki par egzantp menm dan SADC PF ou annan bann *Model Laws* ki ganny aprouve.

E nou koman bann Manm, nou osi nou'n lev lanmen aköz ler ou lo sa Parlman ou pa pe reprezant Sesel. Ou pe reprezant Lafrik. Me ler ou pe ganny demande dan sa Parlman Lafrik, pou ou vin anmenn sa dan ou pei e ki i ava annan en *follow up* lo la. E ki nou osi petet nou sey entegre li dan nou Lalwa ki nou war lamazorite de fwa Madanm Chair, sa dokiman i reste ek nou koman *members*.

Ou pa *Foreign Affairs* mon ti a kontan konnen e tan

donnen ki ou'n travay avek sa bann groupman. Ou laba kot *Foreign Affairs*, kwa ki ou kapab *advice*. E mon pa konnen ki Lanbasad ou pou ale. Petet ki mannyer ou pou fer ki letan sa bann Manm isi dan Parlman i vin ek sa bann *model laws*. Wi, Lasanble i annan son bout petet ki nou, nou merit fer *with regards to* vwar sa bann Lalwa.

E regarde ki mannyer nou, nou kapab rod en fason pou nou entegre li atraver bann diferan Minister ki petet la petet ou annan en *Model Law lo Elderly*. Ou annan en *Model Law lo Disable, people living with disabilities*. Tousala i zis la E oparavan ou demann Minister *Family* dan ansyen Gouvernman e zot dir ou zot pa okouran sa.

Me selman i bann keksoz ki deza la i dan nou Konstitisyon e nou napa en Lalwa pou bann dimoun ki pe viv ek dezabilite. So, ki mannyer zot pe mazine kot *Foreign Affairs* e petet ou koman en Anbasader ki pou vini avek ou pozisyon ki mannyer nou kapab anmenn sa bann *Model Law* ki nou gannyen dan sa bann Parlman Lafrik. SADC PF, *Pan African Parliament* pou nou fer sir ki nou osi nou pe zwe sa rol koman sa Manm Parlman ki nou isi dan sa Lasanble nou ale

nou al laba nou al reprezant nou pei.

Nou al reprezant Seselwa koman Afriken. E ki mannyer sa Lalwa ou kapab fer li vin Sesel osi i benefisye mon kapab dir, avek sa bann Lalwa ki nou pe aprouve deor. Mersi.

MR TERRY ROMAIN

Onorab Mersi pou ou kestyon. Mon pe mazine parey ou'n dir ler ki attend bann miting *SADC-PF*, oubyen *Pan African Parliament*. Sa bann lenstitisyon petet ki zot pe fer zot pe *come up* avek bann *Model Laws* ki pou enplimant bann *best practices* dan bann pei. E ki en kantite i swiv lo Sistenn *Commonwealth* kapab dir.

Ki sa ki zot anvi ki tou pei i lev lo standar pou zot sitwayen. *Now, Foreign Affairs* li ki i fer son kontribisyon son partisipasyon se petet i pou fasilite ki Onorab sorti isi dan Lasanble i kapab *attend* sa bann miting par egzant si i fer Sid Afrik, nou Lanbasad laba wi i donn son sipor dan bann fason en pe pli direk lo sa bann *MNAs* oubyen menm par ler Speaker ki pe *attend*.

Now, prezan ler nou Sesel ki nou partisip dan sa bann keksoz, e ki nou war i pli bon pou nou siporte. Mon krwar ler i annan en fason ki sa bann

MDAs isi *then* ki responsab pou lenplimantasyon i antre avek zot prezan sa pou fer pou sanz Lalwa. Akoz *obviously* i vin avek en sanzman Lalwa ki ganny fer.

Foreign Affairs i kapab kontinyen ede, akoz par egzant Sid Afrik si nou servi menm legzanp nou fer bann *Joint Commission* ki bann *MDAs* i partisip lo la. E mon panse osi lo kote Lasanble Nasyonal *MNAs* osi i kapab partisip lo la. Ki sa bann diskisyon i ganny leve, e ganny swiv tou le 2an par egzant ek Sid Afrik ki mon pe pran legzanp.

Akoz si nou anvi par egzant ki zis nou pou al laba, koze sipor sa bann keksoz vote me nou anvi swiv sa bann *benchmark*, nou anvi swiv sa bann *Model Laws*. *Then*, i en travay ki Lasanble avek sipor *Foreign Affairs* i bezwen get dan en pli bon *MDAs* pou vin pli *engaged* pou zot kapab sanz Lalwa. Akoz pli souvan i vedir ki en sanzman Lalwa isi i bezwen ganny fer. So, Lasanble i travay ek bann *MNAs* ek sipor *Foreign Affairs*. Mersi bokou Onorab.

MADAM SPEAKER

Mersi. Si nou napa okenn lezot kestyon nou ava remerisi Mr Romain. E eskiz li dan *Chamber*. Nou ava osi sorti dan Staz Komite. Mersi Mr Romain.

Nou ava prezan pran okenn lentervansyon. Onorab Vidot.

HON AUDREY VIDOT

Mersi Madanm Speaker. Madanm Speaker, ankor enn fwa bomaten Lasanble Nasyonal ek pep Seselwa in ganny sans swiv kot ankor en lot zenn Seselwa byen edike, byen pasyonnen dan son karyer diplomasi ki'n ganny nominen par Prezidan Larepiblik Mr Dr Patrick Herminie pou pozisyon koman Anbasader.

E Mr Romain sa ki mon'n apresye se ki i pa'n in napa okenn moman pe enport petet ki serten lobstak ki kapab in arive dan son karyer. Me i annan sa perseverans dan son karyer diplomasi. In kontiny lo en aspirasyon pou zwenn en karyer dan diplomasi atraver *Foreign Affairs*.

E in pous li osi pou ankouraz byensir lezot zenn Seselwa ki annan en lentansyon, en lanvi pou en tel pozisyon. E osi en laspirasyon pou bokou lezot zenn letan in met son lespri dan en keksoz pou fer, i apre pou fer li avek bokou pasyans ek tolerans ek lanmour.

E mon apresye letan mon'n demann li kestyon lo laspe kot ki mannier ou kapab ankouraz osi lezot zenn pe

enport ki en sanzman ladministrasyon gouvernans. Me lesansyel se ki sa ki mon kontan in dir lo in rod lanfaz lo lentegrite. E byensir lentegrite, lonnekte dan en louvraz travay ki ou pasyonnen avek, pe enport ki *management* ki la, byensir ou swiv gidans sa ladministrasyon dizour.

Me lesansyel i se ki ou donn tou dan ou domenn travay. Ou travay onnet, ou travay fran avek lentegrite. E ozordi nou vwar legzanp kot Mr Terry Romain in vin fri en prodwir kot son lentegrite in anmenn li lwen. Son langazman, son lanmour ki i pasyonnen dan son karyer in anmenn li lwen, ki i ganny nominen ozordi devan nou Lasanble Nasyonal pou li vin en Anbasader.

E son leksperyans, konesans ki in annan diran son karyer, ankor enn fwa i montre nou Lasanble ki san dout i annan sa abilite, sa konesans e langazman pou li reprezant Sesel koman en Anbasader. E i ava ankor en lot ankor lankourazman byensir pou ki nou bann zenn Seselwa ki angaze ki annan pe enport ki karyer zot pran letan zot fer sakrifis. Zot travay dir, zot montre zot devouman dan zot lorganizasyon travay.

I annan dimoun ki vwar zot abilite, zot kapasite. E mon kontan, mon apresye ki in vin en moman la ki anba sa ladministrasyon nou'n nobou kapab atraver *leadership* Prezidan Larepublik Dokter Herminie nou'n vwar ankor en lot zenn ki annan abilite pou li kapab delivre dan en pli o pozisyon.

E sa ankor i a donn lespwar bann lezot zenn profesyonnel parey Mr Belle bomaten, e osi Mr Terry Romain ki'n vin devan nou Lasanble. Mon parkour dan politik mon'n ganny sans zwenn Mr Romain a plizyer repriz. Mon apresye son lakey dan son profesyon, in toultan en dimoun ki byen zantiy, byen aprosab amikal.

E pe enport kot i ete, nou koman bann Manm Parlman ki'n ganny en sans zwenn li enterakte avek li nou kapab dir poudir nou'n apresye son lakey e son sipor ki'n toultan donn nou koman bann reprezantan lepep, pe enport kot nou ete ki swa lokalman ouswa enternasyonal.

So, mon annan pou mwan swet Mr Terry Romain tou boner e prosperite dan son karyer, son lavi personnel. E ki byensir i kapab kont lo mon sipor, pou siport son nominasyon pou koman en

Anbasader. E mon a demann osi mon bann lezot koleg pou donn li sa sipor, pou ki i a kapab vin sa Anbasader ki pou reprezant Sesel. E kontiny son parkour e ankor byensir enspir lezot pou angaze parey li menm. Mersi Madanm Speaker.

MADAM SPEAKER

Mersi. Onorab Gill.

HON CHURCHILL GILL

Mersi Madanm Speaker. Madanm Speaker, i kler ki nou pe witness en keksoz ozordi dan Sesel. Akoz sa bann zenn profesyonnel ki'n vin devan nou sa 2 ziska konmela, zot kapasite i pa en kapasite ki ou kapab *build up* pandan 5an oubyen 6an/7an.

Tou sa bann dimoun zot in dir nou ziska konmela, zot pe koz 27an leksperyans. So, i kler ki baz letid Sesel pou bokou lannen si in kapab prodwir profesyonnel dan sa bann kalib, i kler ki travay ti pe ganny byen fer. E sa i fer ki ozordi nou'n kapab annan profesyonnel pou re lans la diplomasi Seselwaz aletranze, avek bann *new blood* ki sa dan li menm i en gran keksoz pou en pti pei parey Sesel kot nou pe vwar i annan kontinite kot nou pe vwar ki *Foreign Affairs* in kapab

prodwir apre ki sa bann marmay zot in fer zot letid.

Sa bann zenn profesyonnèl in fer zot letid. E zot in kapab ganny swivi dan zot diferan pos dan *Foreign Affairs*. E ozordi nou vwar zot, zot in apre pou zot pran larelev an menm tan kontribye dan la diplomasi Seselwaz.

Sa i en keksoz ki re enportan, e an menm tan i montre nou ki nou annan zenn dan Sesel ki annan kapasite. E nou ankò annan bann zenn ki kapab vwar poudir loportinite ler ou pran ou letid o serye loportinite i toultan la. E ler ou fer ou travay byen i pou annan ou letan kot ou osi ou pou ganny eleve baze lo kapasite ki ou'n kapab demontre dan ou travay, pou ou osi kontribye dan devlopman ou pei dan en fason pozitiv. E ki Sesel son paviyon i a flot tre o lo en nivo enternasyonal. Mersi Madanm Speaker.

MADAM SPEAKER

Mersi. Si napa okenn lezot entervenàn. Onorab Lemiel *right of reply*.

HON SYLVANNE LEMIEL

Mersi Madanm Speaker. Madanm Speaker, ozordi bomaten nou'n annan nou Mr Terry Romain en zenn diplomat

avek 27an leksperyans dan la diplomasi, kot li menm in enform nou ki in servi diferan divers rol dan Minister *Foreign Affairs*.

E in menm enform nou ki in travay isi dan nou Lasanble Nasyonal osi. E nou kapab dir a sa laz 48an in annan en *vast* leksperyans nou kapab dir, sirtou dan la diplomasi. E Madanm Speaker, nou'n ganny sans demann li kestyon in reponn. E alors mon ti a kontan met devan Lasanble Nasyonal pou nou donn nou sipor e aprouv nominasyon Mr Terry Romain koman en nominen en Anbasader *Extraordinary and Plenipotentiary* pou Repiblik Sesel. Mersi.

MADAM SPEAKER

Mersi. Nou ava aprezan pran en vot lo Mosyon. *In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr Terry Romain as Ambassador Extraordinary and Plenipotentiary of the Republic of Seychelles.* Tou Manm ki aprouv Mosyon? Mersi. Okenn Manm ki kont? Mersi.

Alors, vote lo Mosyon i 23 Manm ki'n vot pour, avek 5 ki'n *abstain*. Nou'n alors ariv a lafen

pou al bomaten. Nou ava pran en *break* ziska 2er kot nou pou vwar lot kandida pou Anbasader.

(BREAK)

MADAM SPEAKER

Mon a dir bonn apre midi tou dimoun. Nou ava rebran azanda pou ozordi. Nou ava aprezan bouz lo lot Mosyon. Onorab Lemiel.

HON SYLVANNE LEMIEL

Mersi Madanm Speaker. Bonn apre midi Madanm Speaker. Tou mon bann koleg Manm Onorab, e tou dimoun a lekout.

In accordance with Articles 63(1) and 64(1) of the Constitution, the National Assembly approves the proposed appointment by the President of Mrs Jacqueline Silla Moustache BELLE as Ambassador Extraordinary and Plenipotentiary of the Republic of Seychelles. Thank you.

MADAM SPEAKER

Onorab Vidot.

HON AUDREY VIDOT

Motion seconded Madanm Speaker. *Thank you.*

MADAM CHAIR

Nou ava aprezan al dan *Committee Stage* pou resevwar Mrs Moustache Belle.

Bonn apre midi Madanm Moustache Belle. Mon ava demann ou pou fer en prezantasyon pou nou bann Manm. Mersi.

MRS JACQUELINE MOUSTACHE BELLE

Mersi Madanm Chair. Madanm Chair. Onorab *Leader* Lopozisyon. Onorab *Leader* pou Zafer Gouvernman, tou Manm Onorab, tou dimoun ki pe swiv, bonn apre midi *tous*.

I fer mwan en gran loner ozordi pou mwan prezant mon nominasyon koman Anbasader. Dabor, mon ti a kontan remerisi Prezidan Larepiblik Dr Patrick Herminie pou met konfyans dan mwan e pou donn mwan sa loportinite.

Mon apel Jacqueline Moustache Belle. Mon'n grandi Mont Buxton. Apre mon maryaz mon'n al etabli mwan La Misère. Mon en manman 3 zanfan. E mon annan osi 3 pti zanfan. Mon ti lekol Ste Claire, apre mon ti kontiny mon letid dan *Teacher Training College*.

Mon'n komans mon karyer zournalis avek Radyo Sesel a laz 21an. E avek *RTS* mon ti devlop sa konfidans e abilite pou apros dimoun sorti

dan tou kous lasosyete. Mon ti aprann kominike avek klerte pou partaz lenformasyon, apropiye avek lamas. E mon parkour dan la diplomasi ti komans ler mon ti annan 28an koman *Chief of protocol* dan Minister Zafer Etranzer.

E mon devwar laba letan mon ti pe fer sa louvraz koman *Chief of Protocol* sete akreditasyon Anbasader. Ranforsi kad korperasyon bilateral e multilateral. E kordin bann vizit Sefdeta. E sa lepok ti annan Prezidan *La France*, Prezidan Mitterrand. Prezidan Lasin, Prezidan Endyen parmi lezot.

An 1993, mon ti ganny segonde kot Minister *Sports*. Laba i ti pou mwan asiste pli gran levennman sportif dan Sesel sa lepok, sete *Jeux Des Iles* Losean Endyen. E mon ti ganny responsabilite akreditasyon avek *protocol*. E par answit mon ti zwenn Minister Tourizm, pou etabli e fer marse premye Sant Konferans Enternasyonal dan Sesel ICCS.

E apre sa mont i transfer pou vin Direkter *Promotion and Marketing* dan menm Minister. Mon gran pasyon pou medya ti fer mwan retourn *SBC* ankor enn fwa. E safwasi sete an plen tan. An 2001, mon ti aksepte

pozisyon *Marketing and Public Relations* and pli tar mon ti pran responsabilite fer marse nou 2 Stasyon Radyo sa set Stasyon Radyo Sesel e Stasyon *Paradise FM*.

An paralel mon ti prodwir prezid program *Face à Face*, avek bi pou edik lapopilasyon lo bann faktor ki enfliyan desizyon *du jour* Ladministrasyon Piblik. *Face a Face* ti zwe en gran rol dan promouvwar latransparans e bonn gouvrenans dan pei. Sete premye platform televize kot teknokrat, Servis Prive e politisyen ti esanz e debat lo zot pwennvi e zot diferans.

An 2012, koman *Maire de Victoria* mon ti anmenn bann responsab biznes prive e fonksyon piblik ansanm pou amelyor Viktorya. Atraver sa partenarya, mon ti pran linisyativ pou demann kontribisyon finansye pou aste dekorasyon lalimyer nwel e pou organiz sanson nwel dan lavil Viktorya. Parske sa letan Minister Finans pa ti ankor donn larzan dan Bidze pou sa levennman.

E evidaman ozordi mon tre fyer, ki 10 an pli tar sa aktivite ki ti en gran sikse sa lepok in aprezan grave dan kalandriye Viktorya. Pou konponan enternasyonal Mer

Viktorya, mon ti promouvwar Sesel. E etabli en *network* solid avek bann lorganizasyon kot Sesel ti Manm tel ki *United Citizen Local Governments* e Lasosyasyon Enternasyonal *des Maires Francophone*. Osi byen ki *Commonwealth Local Government Forum*.

Aprè lan kan ti'n ler pou eleksyon, mon ti sezi loportinite pou mwan met mon kandidati kot mon ti *campaign* e ganny eleksyon pou vin Vis-Prezidan pou Rezyon *Afrique de l'Est*. E par laswit mon ti met kandidati dan eleksyon enternasyonal, e ranport laviktwar pou reprezant Lafrik set fwasi a nivo mondyal e lezot co-Prezidan a kote mwan pou *World* sete *Lasin* ek *Ecuador* e Larisi.

Pandan ki mon ti *Mayor*, mon ti dedye mon letan lib pou diriz kreasyon premye Stasyon Radyo Prive dan Sesel. Avek lasistans en kole, nou ti persevere *jusqu'au bout*. E an Out 2013, *Pure Fm* ti ganny son *license*, baze lo en repitasyon solid e abilite pou delivre. An 2016, ansyen Prezidan Larepublik Mr Danny Faure, ti demann mwan pou vin son *Chief Presidential Protocol Affairs*.

Avek gran loner e fyerte, mon ti donn mon servis pou

mon pei dan sa kapasite tre o nivo. E sa louvraz dan sa responsabilite, ti nesesite la diplomasi, bokou tolerans e pou kordin ant *la présidence*, bann Minister, manm piblik, zofisye militè. E bann misyon lokal e enternasyonal.

An Oktob 2020, avek sanzman ek nouvo administrasyon *UCLG Africa* sa lorganizasyon *Pan African* ti apros mwan, e ofer mwan pozisyon pou Direkteur pou *Gender and Youth*. Mon ti baze *Maroc* pou en peryod 3an. Madanm Chair, mon parkour profesyonnel in etal lo plis ki 40an e prensipalman dan la diplomasi, *journalism* e administrasyon piblik.

Travay dan fonksyon piblik, in anmenn mwan gran fyerte. Mon'n touzour mentenir lentegrite, e monn akonplir bokou. Ozordi mon ankor ranpli avek lenerzi, lafors e motivasyon pou kontinyen kontribye dan lavansman e devlopman mon pei.

E Madanm Chair a *ce point* si ou permet mwan silvouple, mon ti a kontan remersye mon bann ansyen patron ki'n krwar dan mon kapasite. E ki'n donn mwan loportinite pou grandi e epanouir. E osi byen mon bann

koleg e zanmi ki'n siport mon parkour.

En remersiman spesyal pou mon msye, mon 3 zanfan e mon fanmir ki dan tou sirkonstans zot in reste sa bann pilye solid. E Madanm Chair, se avek plezir ki mon ti a kontan reponn okenn kestyon ki bann Onorab ti a swete poz mwan. Mersi bokou Madanm Chair.

MADAM CHAIR

Mersi nou ava pran kestyon Onorab Robert David.

HON ROBERT DAVID

Bonn apre midi Madanm Speaker. Mersi Madanm Speaker. Bonn apre midi osi tou Manm. E bonn apre midi Mrs Moustache Belle. *Welcome* dan Lasanble Nasyonal. E felisitasyon osi pou ou nominasyon. Mon konnen ou en zanfan Mont Buxton.

Mon rekonnet atraver ou *executive profile* ki aparet lo ou CV, ki ou swiv en karyer dan Gouvernans Minisipal. Ou'n osi Direkter *Gender and Youth*, en lorganizasyon ki apel *United Cites and Local Government* baze *Morocco* depi 2021 ziska 2024. Mon'n idantifye dan mon distrik ki i annan bokou group zenn avek bokou diferan lentere.

I annan en group ki motive, angaze dan bann aktivite volonter serye. Si Lasanble Nasyonal i aprouv nominasyon koman *Ambassador Extraordinary and Plenipotentiary* pou Larepiblik Sesel. koman en diplomat, ki mannyer ou pou anvizaze servi bann loportinite ki kapab vin dan ou dispozisyon, pou permet ki zot benefisye bann zenn potansyel dan nou kominote? Mersi Mr Speaker.

MRS JACQUELINE MOUSTACHE BELLE

Mersi Onorab. Alor, pou ou kestyon sa ki baze lo morso pou zenn. Letan mon ti dan *UCLG Africa* mon ti annan sa konponan sa responsabilite pou bann zenn dan Lafrik. E sa louvraz en pe ki mon ti fer, se idantifye bann bezwen. Mon ti lyez en kantite avek bann *Mayors* dan diferan kwen Lafrik, parske ti sete tou Lafrik an antye.

E diskite lo zot bann bezwen, zot bann lanvi, zot bann rev sa ki nou kapab realize. E sa i bann keksoz ki petet i annan osi ki nou pa ti kapab. E alor, ler nou'n konnen ki zot anvi zot bezwen nou idantifye sa bann partner bann *sponsor* bann partner enternasyonal ki nou annan.

Par egzant Linyon Eropeen, Komisyon Linyon Eropeen ti enn nou bann gran siporter.

E apre ti annan bann lezot pei osi, bann pei ki annan kantite larzan ki ti kapab asiste nou. E vwala prezan nou, nou pran sa proze ki sa Mer i anvi sa zenn par egzant la ki si i anvi pou devlope. Nou ekri sa lanvi dan sa proze. E nou fer fason ki nou kapab sours larzan, sours finansyel e osi teknik parske pa toultan ki sa ki zot anvi i finansyer.

Parfwa i bann bezwen teknik. E la nou fer idantifye sa bann *expert* ki kapab vini al kot zot. E partaz sa bann leksperyans avek zot. Soutenir zot dan zot proze. E souvan se parey ou'n dir pou zenn, nou annan en kantite proze pou zenn. E si ou permet mwan Onorab, enn sa bann keksoz osi ki nou ti annan pou zenn la sete prepar bann zenn pou pran la relev an Afrik, akòz nou vwazen in toultan dan *sports*.

Nou vwazen in dan kiltir. Me letan ou al lo kote zenn dan politik, i en pe pli rar. E nou, nou ti ankouraz zot pou zot esey pran konponan politik an konsiderasyon. E vwala, si zanmen zot aprouv mon nominasyon pou mwan vin Anbasader mon mazin en i vin en ekstansyon sa ki mon'n deza

pe fer. E se fwa si sa lo en lot nivo petet dizon. Akòz pou annan en kantite enteraksyon avek bann lezot Anbasader, la kot sa pei kot zot a deside pou anvoy mwan. Mersi bokou Onorab. Fotespere mon'n reponn ou keston. Mersi.

MADAM CHAIR

Onorab Athanase.

HON KENNETH ATHANASE

Mersi Madanm Chair. Bonn apre midi Madanm Chair. Bonn apre midi tou bann Manm ki pe ekoute, bann Manm ki la. E tou bann dimoun ki pe ekoute. Bonn apre midi Madanm Belle.

Vi ki ou'n deza en Mer Lavil, si nou Lasanble i aprouve pou ou vin en Anbasader ozordi ki bann loportinite ou krwar ou kapab anmennen pou nou lavil? Mersi.

MRS JACQUELINE MOUSTACHE BELLE

Mersi Onorab. Mersi pou ou keston. Bon, dan lavil i annan en kantite keksoz ki nou kapab toultan fer progre lo la amelyore. Mon vwar ki tanzantan lavil, nou popilasyon i agrandi i annan plis loto. I annan dimoun kou, koup en pe partou. Par egzant la nou war pe met *railing*.

Nou vwar lalimyer osi i en keksoz ki nou bezwen dan lavil. I annan en gran kantite. I annan petet bann dekorasyon, bann *landscaping*, i annan bann *signage*. Pou dekorasyon apard dekorasyon met de kote. Pou bann lezot keksoz solid ki kapab fer marse lavil i annan en gran levantay sa.

Mon pa pou kapab dir ou egzakteman, aköz mon pa'n diskite. Probableman sa ki mwan mon pe dir pa neseserman ki Mer Lavil pou bezwen la an se moman. Mer lavil i reste en landrwa ki dinamik, ki toultan pou annan. Parey si ou pou koz avek en dimoun lanvironnman, petet li i pou dir ou lo kote *beautification* en pe pli zarbis.

I annan lot dimoun ki pou dir ou non nou bezwen en pe plis bin anvil par egzantp. Sirtou nou annan sa kiltir ki nou gard nou landrwa toultan prop. Evidan probableman i annan landrwa kot ou bezwen, apre i annan bann green areas. *Green areas* i gou nou nonm lo la, i gou nou dir nou anvi.

Me selman ankor nou bezwen regarde dan kantite lespas ki ou annan. I annan lo *Planning Authority* i annan bann dimoun ki ansarz pou balanse ki nou bezwen dan lavil. Me i reste touzour, i reste

touzour dan lavil koman Mer Viktorya. En kantite ki ou kapab fer, e i annan nou kontrent letan mon ti laba. Se annan de ler finansman. Parske tou Minister sakenn i annan son rev, sakenn i annan son plan.

Me ki mannyer nou met sa an aplikasyon finansyerman i en lot keksoz. Me si zot vote, si zot aprouv mon nominasyon evidaman koman Anbasader e kot mon ti dan sa louvraz, konmsi i reste a ker. E mon pou fer tou. Mon kapab garanti ou Onorab, mon pou fer tou si posibilite i prezante pou mwan kapab rod bann keksoz ki Mer Lavil ti a kontan. Me byensir mon ava diskite avek li e aproz si zanmen mon war bann posibilite. Mersi Onorab.

MADAM CHAIR

Onorab Lepathy.

HON NELSIA LEPATHY

Mersi Madanm Chair. Bonn apre midi Madanm Moustache Belle. E mwan koman ou reprezantan dan Lasanble Nasyonal, mon oule felisit ou pou ou nominasyon koman Anbasader. Mon rekonnet ki avek ou leksperyans ki ou annan, ou pou byensir fer en travay formidab pou byennet nou pei.

Mon osi rekonnèt a travè ou ou CV ki ou'n deza Mer Lavi. E ou'n osi Sef Protokòl atase dan Biro Prezidan. Ki mwayen ou krwa sa pou ed ou deservi ou responsabilté koman en Anbasader? Mersi.

MRS JACQUELINE MOUSTACHE BELLE

Mersi bokou Onorab. E mersi pou bann parol felisite. Mersi bokou, mon apresye en kantite. E lot 2 Onorab osi avan mersi. Bon, ou kesyon in focus lo pozisyon ki mon ti annan letan mon ti travay dan administrasyon Prezidan Faure.

Be i annan en kantite diplomasi dan sa pozisyon. E mon pa pe koz ou zis diplomasi aletranze la. Petet parfw i pli fasil fer diplomasi aletranze. Me i annan en kantite diplomasi o nivo lokal. Akòz a sak fwa ki ou pe enterakte avèk dimoun ou bezwen sirtou kot i annan bann sityasyon kot pou balanse ou bezwen aplik la diplomasi si la diplomasi i anmars.

E lot keksoz osi se ler mon ti dan servis prezidan Faure, ti annan bann vwayaz ki parey tou Prezidan i obligasyon zot bezwen al dan plizyè lezot pei. I annan bann miting ki zot bezwen al asiste. I annan bann diferan responsabilté. E letan

mon'n avèk li, al osi in vin en gran levantay en gran apersi kot bann negosyasyon. Bann ki mwayen ou balans bann diferans, akòz letan ou dan miting avèk en dimoun i pa vèdir ki tou keksoz ou bezwen dakor.

Me kan ou pa dakor, se ki mwayen ou met sa bann pwèn devan. Tou bann lapros kot ou balans bann diferan krwayans, diferan kiltir. E vwala dan mon kapasite la mon'n aprann en kantite keksoz. E sa bann keksoz *if anything*, zot kapab azout pou prepar mwan pli byen ki si mon ganny apwente Anbasader. I donn mwan bokou plis bagaz ankò ki mon kapab anmèn devan. Mersi Onorab.

MADAM CHAIR

Onorab Vidot.

HON AUDREY VIDOT

Mersi Madanm Chair. Bonn apre midi Madanm Moustache Belle. Ankò enn fwa mon zwenn mon bann koleg pou felisit ou dan ou nominasyon. Madanm Moustache Belle, mwan mon'n konn ou pa zis letan ou karyer zournalis. Mon'n swiv en pti pe ou parkour. Me osi dan serten bann pozisyon ki ou'n mansyonnen ou'n okipe.

E mon'n osi ganny sa privelez letan mon ti avek en delegasyon Sesel mwan avek Onorab Sathya Naidu si mon rapel byen avek bann zofisye Gouvernman nou ti attend en sesyon *Kisumu Kenya*. E ou'n enn parmi bann ki'n ed nou delegasyon Sesel letan nou ti laba dan nou detres.

Petet pou bann Seselwa ki pe swiv nou deba ozordi ki pa neseserman konn ou a profon. Eski ou kapab dir avek nou bann sitwayen koman en travayer Seselwa en dimoun ki'n devoue dan ou bann parkour lorganizasyon travay. Kwa ki ozordi menm si ou'n ganny nominen ki ou krwar poudir byensir Lasanble Nasyonal spesyalman mon konnen poudir nou lo sa kote latab san dout nou pou aport nou soutyen.

Me ki ou kapab *convinced* poudir be wi mon en travayer, e aköz mon merite mon kapab ganny mon annan sa kapasite pou reprezante koman Anbasader. Mersi.

MRS JACQUELINE MOUSTACHE BELLE

Mersi Onorab. Bon. Ou'n temway mwan letan mon ti pe travay. Onorab Naidu osi letan zot ti vini. E mon pa ti en reprezentan Sesel letan mon ti

laba. Mon ti pe travay avek *United Citizen Local Government*. Me zot ti vini, e letan zot ti arive mon ti fer sir ki zot pe santi zot byen alez e zot kapab swiv.

E mon ti pas mon letan, kot mon ti kapab asiste Sesel a tou mwayen. Parske mon pei, i mon pei. Mon pa pou fer keksoz ki kont regleman. Me ou reste touzour solider e patriyot. E en patriyot mon'n ete toultan dan tou mon lavi. Ler mon'n reprezentant Sesel, e ler mon'n lo tit prive.

E bon aköz mon merite. Aköz mon merit sa plas. Mon'n ganny en gran *exposure* dan mon parkour. Mon'n vwayaz kantite kot par egzant letan mon ti Mer Viktorya, sa bann plas ki mon'n gannyan koman Vis- Prezidan pou *Afrique de l'Est* ek *Co-President* pou monde.

E lo Komite Franse, *Francophones Association Internationale des Maires Francophones* mon ti en manm egzekitif. E pou larezyon par egzant en keksoz ki mwan mon ti pare pou fer, sete pou refer marse *revamp* refer marse en komite ki nou ti annan avek *AVCOI L'Association des Villes et Communes de L'Ocean Indien*.

Ti annan en pe letan kot ti neppli fonksyonnen. Alors, letan mon ti laba zot ti ofer mwan zot ti dir mwan be ekout nou annan en problem la. Parske sa lasosyasyon in mor. Si ou ti a kontan rebran, ti a kre 5/ 6 an ki i pa ti aktiv. E la ankor koman sa dimoun Losean Endyen mwan mon ti krwar ki i pa normal ki nou Losean Endyen nou ti pe ganny *l'appui, Paris, La France* akòz nou, nou bezwen les nou lasosyasyon mor dan Losean Endyen.

Alor, mon ti pran sa linisyativ, sa lanvi, sa responsabilite pou remet nou bann pei Losean Endyen, sa se Moris, *Comores, Madagascar* e byensir *La Réunion* apre nou. Mon ti remet li ankor pou fer marse. Sa annakor i montre bann keksoz ki mon'n fer. E ler mon fer sa tit enternasyonal. E a tou moman a sak fwa ki mon mansyonn mon pei, ou konnen nou ptipti. I annan dimoun i konn nou, i annan dimoun pa konn nou.

E mon'n touzour avek gran fyerte ki mon krwar tou Seselwa osi i fer la menm *chose*, kot mon'n servi sa lokazyon pou promouvwar poudir ki nou ete ki nou pou fer, kwa nou kiltir, kwa nou bann fason viv isi. E byensir pou esey tant sa vizit sa ekstra touris ki ou a gannnen.

Ou dan konteks lezot si i annan sa lesanz la diplomasi ekonomik pou kapab fer. Mon'n touzour servi sa lokazyon Onorab. E mon mazine ki prezan la si zot deside donn mwan sa manda koman Anbasader. Me prezan ki mon louveraz i baze lo sa, mon a fer li ankor as 100poursan si pa plis. Parske i dan mwan, e mon'n toultan sak fwa mon'n ganny loportinite pou anmenn de plis pou Sesel mon'n anmenn. Mersi Onorab.

MADAM CHAIR

Onorab Trevor Louise.

HON TREVOR LOUISE

Mersi Madanm Chair. Bonn apre midi Madanm Chair. Bonn apre midi Mrs Belle. Felisitasyon pou ou nominasyon. Mon kestyon pou ou petet pou vin petet lo bann kalite ki ou prosede koman en endividi ki en *extension of* kestyon Onorab Vidot plito.

Kwa ki fer ou sa meyer reprezantan pou vin en Anbasader pou Sesel? e mon dezyenm kestyon pou ou se an term *tourism*, ki bann mezir ki ou santi ou kapab vin avek pou asire ki nou ganny bokou plis touris ki vin dan nou pei? Mersi.

**MRS JACQUELINE
MOUSTACHE BELLE**

Mersi Onorab. Mersi pou ou bann mo felisitasyon. Bon, *tourism* i en lendistri ki dinamik. I en lendistri ki nou bezwen toultan esey balanse. Paske nou pa zis en sel pei dan lemond antye ki en touris i kapab swazir pou ale.

I annan enn de bann zil parey nou evidaman. Nou dir pou nou i pli zoli, e byensir vre i pli zoli. Me ler en dimoun pe fer en desizyon *tourism* kote i pou ale, i annan en gran levantay devan li. Prezan nou, ki mwan mon sizesyon se ki nou bezwen toultan anmenn sa diferans, anmenn sa morso ki pou atir sa touris plis.

E nou dan *cultural tourism* i tre byen. E ler nou fer sa *cultural tourism*, nou bezwen kapab vann li ki mon krwar Minister Tourism pe fer en bon travay lo market sa bout. E ler sa touris in swazir pou ariv isi prezan la kot i re enportan, e tre delika. E nou bezwen toultan fer sir ki la popilasyon i lo menm paz avek nou dan le sans sa bann dimoun i ganny resevwar parey nou'n promet zot letan zot in fer zot bann resers *virtual*.

E ki letan zot in ariv isi, zot ganny valer pou zot larzan. Zot ganny resevwar e ki sirtou nou

gard Sesel sa landrwa sen e sof aköz si en touris i en pe per, per nou komans dan difikilte la i vin en gro *challenge* pou nou.

Ou lot kestyon se kwa ki mon krwar Onorab. Ou'n demann mwan kwa ki mon krwar e mon annan pou kapab fer mon vin Anbasader. Bon. Parey tou Seselwa mon kapab koz sa 2 lalang prensipal Angle e Franse. E lemond an se moman i koz Angle. Mon ti a voudre kapab koz ankore enn de. Me loportinite pa'n vini.

Bon, mon annan premyerman sa 2 ki mon kapab enterakte avek sa 2 lalang prensipal plizumwen ki koze dan bann Lanbasad partou kot i annan bann Anbasader. E mon annan mon kapab fer lapros atraver mon travay koman zournalis. Mon'n kapab devlop sa kapasite, kwa pou kapab apros dimoun pou enterakte parske koman Anbasader ou bezwen enterakte.

Mon kapab travay par mon prop linisyativ. Mon pa pou bezwen en dimoun vin dir ou tou le bomaten fodre ou fer sa, fodre lot keksoz. Parske mon pa pou dan *headquarters* si mon ganny mete Anbasader. Mon pa pou dan *headquarters*. E ler mon pa pou dan *headquarters*, ki vadir mon

bezwen al dan mon programm. Leve fer ou programm ale travay, e sa mon kapab. Mon kapab travay koumsa.

E en louvraz koman Anbasader osi ou pa reste dan ou pei Sesel. i annan gran probabilitè letan mon pou ganny en *posting* aletranze si mon ganny aprouve pou vin Anbasader. E mon'n kapab ziska *maintenant* partou kot mon'n bezwen al reste dan bann diferan pei lemonn, mon'n kapab adapte. E aprann aksepte sak kiltir, sak fason manze. Sak lanouritir ki dimoun i manze e klima ki sa bann pei i ladan.

Alor, mon mazine ek tou sa i bann keksoz ki kapab prepar ou pou ou kapab pran sa responsabilitè koman Anbasader. Mersi Onorab.

MADAM SPEAKER

Bon. Si nou napa okenn lezot kekyon, nou ava remersye Mrs Moustache Belle e eskiz li dan *Chamber*. E nou pou osi sorti dan *Committee Stage*.

Nou ava prezan pran bann entervansyon deba lo Mosyon. Onorab Lepathy.

HON NELSIA LEPATHY

Mersi Madanm Speaker. Koman en madanm, e koman Manm Elekte pou distrik Grand

Anse Mahe i en loner ozordi pou mwan eksprim mon sipor total pou nominasyon Madanm Jacqueline Moustache Belle koman en Anbasader.

Sa nominasyon i rekonnet pa zis son bon kalifikasyon profesyonnel. Me osi son devouman pou met Sesel lo lasenn enternasyonal. Mrs Moustache Belle, i anmenn bokou lannen servis dan zournalizm, diplomasi ek Ladministrasyon Piblik kot son karyer dan broadcasting avek Radyo Sesel e SBC i montre son pasyon pou kominikasyon.

Aprè i ti servi avek distenksyon dan Minister Zafer Etranzer e Planifikasyon Tourizm ek transpor, dan en pozisyon ki'n donn li bon leksperyans dan protokol enternasyonal ek devlopman nasyonal. Koman Mer Lavil, an 2012 ziska 2016 i ti diriz avek vizyon e enklisivite ganny konfyans ek respe bann kominote.

Bann pozisyon ki'n travay lo nivo mondyal i montre son abilite diplomatik ek son langazman pou lazistis ek ledikasyon. Son kordinasyon abilite medya, konpetans administratif ek leksperyans enternasyonal i fer li byen pare pou servi koman en nouvo Anbasader.

I konpran la diplomasi mondyal ek bezwen tou le zour nou sitwayen. Son kapasite osi pou koz Angle, Franse e Kreol i asir bon komunikasyon dan nenport ki *forum*. E Madanm Speaker, dan madanm Moustache Belle nou annan nou en kandida ki annan rezilyans, professionalize e vre pasyon pou servis.

Mon ankouraz sa Lasanble pou soutenir son nominasyon avek konfyans ki i pou reprezant Sesel avek Dinyite e devouman san limit. Mersi Madanm Chair.

MADAM SPEAKER

Onorab Vidot.

HON AUDREY VIDOT

Mersi Madanm Speaker. Madanm Speaker, pli boner dan enn bann lentervansyon par fer par Onorab Gill in fer resorti en pwen kot letan nou i enportan ki nou war i annan en balans dan diferan groupman nou bann kandida potansyel ki annan sa abilite pou reprezant koman en pozisyon Anbasader.

E bomaten nou'n eksperyans 2 zenn *homme* diferan laz. E ozordi apre midi la nou'n vwar en madanm menm si son laz i diferan avek sa 2 lezot pli boner. Me i en manman, en granmanman. Me

an term son abilite, son servis e kouraz ki i annan pou fer i ankor annan en kantite.

Nou'n atraver bann ki'n konn Mrs Jacqueline Moustache Belle in kapab konnen zot in kapab enterakte avek li, zot in vwar son abilite, son kapasite pou li byensir pa zis enterakte avek nenport ki group. Me atraver son bagaz leksperyans e konesans, i san dout osi i pou ed li dan son pozisyon si nou Lasanble nou aprouve pou li vin en Anbasader.

I annan sa abilite pou li fer li. Mwan personnelman mon kapab partaz avek pep Seselwa letan parey mon ti pe demann li pli boner. Letan mon'n ganny sans eksperyans en langazman ki nou bann Manm Lasanble serten nou ki ti ganny nominen pou reprezant koman bann distrik dan lavil, bann dirizan kot nou ti ganny sans attend en seri program travay kot nou ti groupe avek bann diferan Manm parlman e bann *Mayor Kenya Kisumu*.

Nou'n enterakte avek Mrs Moustache Belle, menm si parey i ti pe dir i pa ti pe reprezant Sesel. Me san dout i pa ti dekonekte avek son enn frer/ser Seselwa, menm si i ti pe reprezant en lorganizasyon prive i ti touzour pare pou

promote e siport langazman Sesel. E ed nou dan bann moman difisil osi.

I montre ou bann langazman e lanvi pou kapab fer sa diferans. Son parkour travay, son bann bagaz ki i annan mon asire ki i kapab anmenn ankor bokou plis kontribisyon e benefis pou Sesel koman en Anbasadris. E mon krwar poudir koman en madanm byen matir, byen entelizan avek bokou leksperyans, bokou konesans enternasyonal i kapab vin en aspirasyon pou lezot Seselwa. Be it en zenn, *be it middle age* ki kapab annan sa kapasite pou agrandi zot karyer profesyon.

E ganny en sans loportinite pou vin reprezant Sesel, e rod fason atraver zot leksperyans travay anmenn plis kontribisyon pozitiv ki pou dan lentere e benefis Sesel. Mon ti ava swete ankor atraver son pozisyon kot i pou ganny gide pou dirize. I ava anmenn ankor plis pou byennet espesyalman son parkour konesans lo nivo Gouvernans lokal ki mon asire pou ede aport pli soutyen.

E dan nou bonn gouvernans travay isi Sesel menm. E mwan mon pou zwenn mon bann koleg, mon pou aport sipor pou son nominasyon. E mon swet li tou boner, e tou

prosperite dan son karyer e son lafanmir. Mersi Madanm Speaker.

MADAM SPEAKER

Onorab Gill.

HON CHURCHILL GILL

Mersi Madanm Speaker. Bonn apre midi tou dimoun ki pe ekout nou. Madanm Speaker, en keksoz ki konsistan depi bomaten ler nou pe kestyonn sa bann nominasyon se en akimilasyon leksperyans. Nou'n vwar ki sa 2 zenn ki'n vini premye, zot in koz nou en kantite lannen leksperyans ki zot in akimile.

E la Madanm Belle li osi in akimil kantite leksperyans. E en keksoz ki komen osi ek tou le 3 se zot tou zot in fer parkour dan *Foreign Affairs*. E sa dan li menm i montre ki sa bann dimoun i pa bann dimoun ki pe al dan en landrwa enkoni. Zot konn tre byen kot zot pe ale, e ki zot devret fer.

I annan dimoun petet i a dir poudir petet aköz bann lezot dimoun pa ganny loportinite. Sa 2 zenn premye ki'n pase in montre nou en keksoz tre fondamantal. Enn i dir nou in pran li 27an avan ki in kapab ganny nominen.

So, i kler ki bann diferan zenn zot pare apre serten

kantite lannen. So, i kler la *as we speak* i annan bann zenn ki dan preparasyon. Me zot pa ankò kapab ariv sa nivo oubyen annan sa kantite bagaz pou zot pran zot bann responsabilté ozordi. Me selman zot *in the queue* pou zot pe al pran a en moman apwopriye.

Me selman tousala i vin avek akimilasyon leksperyans, akòz ler nou pe reprezant nou pei aletranze dan pos Anbasader i enportan ki leksperyans i en pwen kle pou asire ki tou sa ki zot in tonm dakò, bann lenstriksyon ki zot in gannnen pou al fer oubyen bann keksoz ki nou pei oubyen nou Dirizan i ekspekte de zot, zot kapab fer akòz zot annan zisteman sa bann kapasite e leksperyans.

E se sa ki zot in gannnen nominen akòz Prezidan in vwar ki sa bann dimoun zot kapab fer en diferans lo lasenn enternasyonal pou Sesel. E se sa rezon ki zot la, e tan ka nou lo sa kote latab nou pou sipòt nominasyon Madanm Belle akòz nou krwar i annan bokou pou ofè.

E pou kapab fer kontribisyon, e apòt diferans pou Sesel e kot tou Seselwa a benefisye. Mersi Madanm Speaker.

MADAM SPEAKER

Mersi Onorab. Vi ki nou napa okenn lezot entervenans. Onorab Lemiel, *right of reply*.

HON SYLVANNE LEMIEL

Mersi Madanm Speaker. Madanm Speaker, ozordi apre midi nou vwar ankò en madanm. En madanm ki annan en vast leksperyans dan diferan domenn zournalis, la diplomasi, in en administrater. In pas en pti pe partou, partou dan son karyer travay.

E in menm travay dan bann lorganizasyon enternasyonal li menm, kot in travay dan gouvènans minisipal nou kapab dir. E an menm tan lo kote diplomasi miltilateral. E Mrs Moustache Belle li menm i en dimoun ki'n travay dan *leadership* nou kapab dir. In responsab in a latet bann diferan lorganizasyon Mer Lavil i enn kot in eksplik nou en pti pe kwa ki li in fer.

E mon kontan ozordi ki nou vwar madanm i kontinyen pe gannnen donn sa lenportans sirtou an sa ki konsern bann pozisyon kle. La nou pe vwar en madanm ki pe gannnen apwente koman Anbasader. E i pou al reprezant Prezidan dan bann

diferan *forum*, dan bann diferan levennman ki pou pe ganny fer.

I pou pe reprezant nou, nou pei dan sa bann diferan *forum* ki li koman Anbasader i pou bezwen form parti son louvraz. E mon santi ki Prezidan i bezwen vwar ki si in swazir li, i bezwen in vwar ki i annan sa kapasite ek abilite pou li kapab desarz sa louvraz.

Ou konnen Madanm Speaker, i annan de fwa ou ganny bann diferan komanter petet ki sorti kot bann dimoun ki pa pe tonm dakor avek en lapwentman, sa enn pa *deserve*. Me selman dan lavi nou bezwen donn tou en dimoun en sans, ou bezwen donn tou dimoun en sans pou li prouv son lekor.

E mon'n deza dir parey ler nou ti pe apwent bann Minis, en dimoun pa la pou pyer li, en dimoun i kapab ganny ranplase i kapab ganny tire si i pa pe perform son travay. Alors, mon krwar bann apwentman ki nou pe vwar annou donn dimoun zot sans pou zot kapab montre kwa ki zot kapab fer avek zot abilite ki zot annan.

E dela apre si nou vwar i pa pe perform byen, oubyen Prezidan li menm i war i pa pe perform byen e zot kapab *recall* sa bann dimoun si i pa pe *perform* i ranplas zot par en lot.

So, mon ti a kontan Madanm Speaker demann nou Lasanble Nasyonal pou zot aprouv sa lamannman propoze par Prezidan, pou nou apwent Madanm, Silla Moustache Belle koman Anbasader *Extraordinary and Plenipotentiary* pou Repiblik Sesel. Mersi.

MADAM SPEAKER

Mersi Onorab. In ariv letan prezan pou nou pran en vot lo Mosyon. *In accordance with Articles 63(1) and 64(1) of the Constitution, the National Assembly approves the proposed appointment by the President of the republic of Mrs Jacqueline Silla Moustache BELLE as Ambassador Extraordinary and Plenipotentiary of the Republic of Seychelles.*

Tou bann Manm ki annakor avek Mosyon? Mersi. Okenn Manm ki kont? Bon vot lo Mosyon i 17 ki'n vot pour avek 11 ki'n *abstain*. Nou pou aprezan pran en *break* ziska apepre 3er en kar. Nou ti ti'n *schedule* pou pran Mr Andre Pool pou li komans 4er. Me selman in les nou konnen ki i pou kapab fer li pou nou kapab komans 3er en kar. Mersi. Nou ava pran en *break*.

(BREAK)

MADAM SPEAKER

Bon. Nou ava pran dernyen Mosyon pou ozordi. Onorab Lemiel.

HON SYLVANNE LEMIEL

Mersi Madanm Speaker. *In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr. Andre Louis Bernard POOL as Ambassador Extraordinary and Plenipotentiary of the Republic of Seychelles. Thank you.*

MADAM SPEAKER

Onorab Vidot?

HON AUDREY VIDOT

Motion Seconded Madanm Speaker.

MADAM SPEAKER

Mersi. Nou ava aprezan al dan *Committee Stage*, pou nou resevwar Mr Pool. Bonn apre midi Mr Pool, mon ava demann ou pou fer en pti prezantasyon pou nou bann Manm.

MR ANDRE POOL

Mersi Madanm Chair. Bonzour Madanm Chair...

MADAM CHAIR

Si ou kapab met ou *mic on silvouple*.

MR ANDRE POOL

Sorry. Bonzour Madanm Chair. Deputy Speaker. Leader Lopoziyon. Leader of Government Business. Tou bann MNAs isi prezan e piblik ki a lekout.

I touzour en gran plezir pou retourn dan sa lenstitisyon landrwa kot mon'n pas preski 30an mon lavi koman en Manm Lasanble, e fini koman *Deputy Speaker*. Me ozordi mon la devan zot anvi ki Prezidan Dr Patrick Herminie in Nomin mwan pou vin en Anbasader pou Sesel e mon'n aksepte.

Deza dan son *interview* ki i ti fer avek lapres, Prezidan in eksplike ki Gouvernman in pran en desizyon pou reouver Lanbasad *Havana Cuba*. E mon'n ganny sa latas pou fer sa travay. E osi ganny apwente koman Anbasader si zot aprouve, baze dan sa pei.

Byensir apard *Cuba* pou annan osi lezot ziridiksyon dan sa rezyon ki pou tonm anba mon responsabilite. Me sa Departman Zafer Etranzer pe travay lo la e ava ganny anonse dan son moman apropiye.

Madanm Chair, permet mwan prezan briyevman pas en pe lo parkour mon lavi ki lo mon

CV. Mon pe reste Anse Boileau, marye, 3 zanfan. E kot langaz i konsernen mon domin Kreol, Angle, Franse e *Espanol*. E sa i en lavantaz pou sa responsabilite ki mon pe gannnen.

Mon parkour ledikasyon Primer Lekol Anse Boileau. Segonder mon ti fer li *Seychelles College* sa lepok. E ledikasyon Liniversite *Havana Cuba*, dan *Social Sciences* i annan i apel li *Political Sciences*. E dan sa parkour mon'n fer size tel ki Relasyon Politik Enternasyonal, Relasyon Ekonomik Nasyonal, Listwar Lemonn ek son bann diferan konsekans ki pou ed mwan dan desarz mon responsabilite.

Mon'n osi fer en long parkour dan responsabilite Lezislatif, kot mon ti antre koman en Manm Lasanble Popiler an 1987. E pli tar 1993, 3enm Repiblik Manm Lasanble Nasyonal ki mon'n ladan ziska mon ti arete an 2016 koman Deputy Speaker.

Mon'n osi Chairman Relasyon *International Affairs Committee*. Mon'n *Chairman Media Committee*. Mon'n Manm *ACPEU Joint Parliamentary Assembly* sa lepok in fer mwan ganny sa loportinite partisip dan en kantite bann *forum* enternasyonal e fer konnen

pozisyon Sesel lo tou bann size ki'n ganny diskite.

Madanm Chair, mon'n osi Manm *Pan-African Parliament 2013* ziska 2016. Mon'n osi partisip dan plizyer lobzervasyon eleksyon antan ki *SADC-PF*, *OIF* e *Commonwealth* zis pou donn enn de legzanp. E sa si oule in permet mwan travay bokou pros avek Minister Zafer Etranzer pandan sa peryod.

Apre sa Madanm Chair, mon'n ganny sans pran responsabilite koman Sef Egzekitif Lotorite *Licensing* pou en peryod 5an. E apre sa mon'n al dan Sekter Prive. An 2021, mon ti ganny elekte koman *Chairman Seychelles Cuba Friendship Association (SECUFA)* in permet mwan si oule annan en tre bon relasyon avek pa zis Lanbasad *Cuba* isi Sesel, me avek bokou bann dirizan sa pei kot mon'n *attend* plizyer *forum* e diskisyon avek zot.

Madanm Chair, parey Prezidan in eksplike nou ekspekte bokou plis benefis ki nou pe gannnen ozordi avek sa lanbasad ki nou pou ouver *Cuba*. Pli spesifikman, tel ki dan domenn Lasante, *Sports*, Kiltirel e lezot posibilite *training* pou nou Seselwa.

Pa oubliye ki bokou Seselwa in benefisye dan lepase avek bann *scholarships* dan sa pei. E ozordi pe okip plizyer pozisyon enportan dan nou pei. Mon pou osi met lanfaz lo program lesanz Parlmanter ant sa 2 lenstitisyon sa 2 pei. En keksoz ki mon ti promot en kantite, ler mon ti *Chairman International Affairs Committee* nou Lasanble.

Si zot aprouv mon nominasyon byensir mon pou bezwen pas en pe letan pou aprann tou sa ki nesese anba gidans Minister Zafer Etranzer, tel ki zot bann prensip, Polisi ki diriz Zafer Etranzer nou pei. E bann term referans ki aplike pou en Anbasader Sesel parmi lezot ankor.

Mon osi bezwen fer plis konesans tou bann divizyon e seksyon anba sa Minister, e zot rol ek zot fonksyon. Alors Madanm Chair, mon demann Lasanble pou fer mwan konfyans. Ki mon pou desarz sa responsabilite pou mon pei e pou benefis tou nou sitwayen. Mersi Madanm Chair.

MADAM CHAIR

Mersi Mr Pool. Eski nou annan okenn kestyon? Onorab Gill.

HON CHURCHILL GILL

Mersi Madanm Chair. Bonn apre midi Mr Pool. Felisitasyon pou ou nominasyon. Lo ou CV i montre ki ou'n pas en pe letan dan en Liniversite laba *Cuba*. E ler ou'n fini dan Liniversite ou retourn Sesel, ou'n osi dan Lasanble. E i kler osi ki Sesel in benefisye en kantite atraver bann Profesyonnel Lasante ki sorti *Cuba*.

Eski ozordi la 2025 ki ou pe ou nomen ou'n ganny nomen pou Anbasader pou *Cuba*. Eski si ou ganny aprouve, eski ou vwar ki sa scope lasistans profesyonnel Lasante ki nou ti pe gannye avek *Cuba* sa letan konpare ek ozordi. Eski ou krwar poudir i annan potansyel kot sa kolaborasyon i kapab grandi bokou plis ki i ete?

Mon dezyenm kestyon. E i kler ki *Cuba* osi i tre repite lo serten domenn sportif, si mon kapab nonm 2 parey koman bokse e atletik. Bann ki nou konnen zot in fer bon perse enternasyonalman. Eski sa kolaborasyon osi i pou kapab osi grandi apard ki domenn lasante, me i osi al dan domenn sportif? An menm tan, eski ou krwar ou pou kapab ouver bokou plis lafors pou nou bann dimoun ki deside pran karyer dan Lasante, pou ganny *training* laba.

I annan 2 konponan enn kot nou ganny kolaborasyon avek zot bann profesyonnèl *medicine*. Me mon lot kestyon se posibilite pou nou bann etidyan pou *medicine*, ou krwar sa kolaborasyon osi i kapab ouver dan s domenn ki bann zenn Seselwa i a kapab benefisye avek? Mersi.

MR ANDRE POOL

Mersi pou ou kestyon. Bon, lo size plis kolaborasyon e plis spesyalis dan domenn Lasante. So, sa definitivman i en size ki nou tre enterese avek. E nou'n menm komans fer serten refleksyon lo la, lo ki domenn priyoriter ki nou pou demann lasistans e sipor *Cuba* pou nou ganny plis spesyalis dan domenn Lasante.

E parey zot konnen nou'n deza siny en lagreman avek *Cuba* ki ti la depi oparavan. Me nou'n plizoumwèn renouvle li. So, nou pou bezwen revwar sa lagreman. E si fodre re-negosye li pou donn nou plis spesyalis. Definitivman, nou pou fer li. *Scholarship* osi menm zafer, parey zot konnen en moman nou ti annan en kantite *scholarship* dan domenn *medicine* kantite nou bann dokter nou bann spesyalis in *train Cuba*.

So, i pou enn bann priyorite pou nou kapab ganny plis *scholarship* ki nou pe gannye konmela avek Gouvernman *Cuben*. Lo kote sport, parey mon'n dir dan mon prezantasyon definitivman *Cuba* i en lafors dan *sports*. E atraver mon *Chairmanship* lasosyasyon, nou deza komans serten demars dan sa domenn kot nou ti anvoy kot nou ti kapab fer vini en delegasyon bokser detrwè semenn pase.

Me ler zot in isi, zot in regard en pti pe ganny en pe diskisyon avek bann Lotorite Bokse lo ki mannyer nou kapab kolabore dan domenn bokse. Me avek mon prezans laba, i pou fer keksoz bokou pli fasil akòz tou le zour ou pou kapab kominike avek bann lotorite konsènen pou nou kapab vwar ki kantite benefis nou kapab tire. Pa zis bokse me dan lezot domenn *sports Cuba* avek Sesel.

Me loportinite i vast, parey mon'n dir nou annan bann lezot domenn ankor ki mon asire ki nou pou tir en kantite benefis pou nou pei. Mersi.

MADAM CHAIR

Mersi. Eski nou annan ankor okenn lezot kestyon? Si nou napa okenn lezot kestyon nou

ava remersye... Onorab Georges.

HON BERNARD GEORGES

Mersi Madanm Chair. Madanm Chair Bonn apre midi. Onorab Pool, *once an Honorable, always Honorable*. Mon ti anvi demann ou en kestyon. Nou konpran konzonktir sa ki ou'n met devan nou la apre midi. Sa i en lapwentman spesifik pou en post spesifik avek en bi spesifik.

Mon kestyon se sa, eski sa ki ou pou al fer laba oubyen sa ki dan ou manda pou al fer laba ki ou'n eksplik avek nou ozordi. Eski nou pa ti pou kapab fer li *from here* olye ouver en Lanbasad *Havana* e avek tou *cost* ki vin avek? E la mon ti a kontan si ou ti ava kapab eksplik nou en pti pe ki ou ekspekte sa kou. Eski pou annan rannman?

Oubyen eski sa travay ki ou pou al fer laba pa ti kapab osi ganny fer par nou reprezantan kot Nasyon Ini ou *Washington*. Mon konpran kekfwa i annan en problem politik ant akreditasyon *Washington* i akreditasyon *Cuba*, me mon pa sir. Vwala mon kote mon ti a kontan ganny en pe leksplikasyon silvouple. Mersi.

MR ANDRE POOL

Mersi Onorab. Madanm Chair. Mon krwar diplomasi lemonn ozordi i montre ki ler ou dan sa landrwa i bokou pli fasil pou ou kapab demande, negosye e gannnen. Sa ou a dakor avek mwan Onorab. Nou annan en kantite legzanp kot sa in posib. Lanbasad parey ou pe dir, nou lanbasad Nasyon-z Ini ki ozordi pe okip *Cuba* i osi annan bann lezot apard Nasyon-z-Ini, i annan Lanmerik e lezot pei Lanmerik latin ek bann zil Karibyen ki fer li en kantite travay pou li.

E i pe vwar li difisil pou li fer sa ki ou, ou ape propoze an sa ki konsern agrandi sa relasyon avek *Cuba*. So, vwala enn bann rezon an tou ka ki Gouvènmman ki Prezidan in deside pou pran sa desizyon pou nou fer sa louvertir sa Lanbasad *Havana*, pou nou kapab fer keksoz bouz pli vit pou nou kapab fer keksoz bouz dan direksyon ki nou, nou ava ale.

Me listwar i ava montre apre, si ou annan rezon oubyen si Gouvènmman - *proposal* Gouvènmman i annan rezon. Me pou le moman vwala nou, nou santi ki louvertir sa Lanbasad *Havana* i pou anmenn bokou plis benefis ki nou pe tire ozordi. E parey mon'n dir

listwar i ava zize si nou'n pran *the right decision*. Mersi Madanm Chair.

MADAM SPEAKER

Mersi. Bon, mon pa pe vwar okenn lezot kestyon. Nou ava remersi Mr Pool e eskiz li dan *Chamber*. E nou ava osi sorti dan *Committee Stage*. Lentervansyon prezan *from the House*. Eski nou annan okenn Manm ki anvi fer... Onorab Sopha.

HON GERRY SOPHA

Mersi Madanm Chair. Bonn apre midi Madanm Chair. Bonn apre midi tou bann Manm koleg Onorab. Bonn apre midi tou dimoun ki ep ekout nou. Madanm Chair, mon krwar nominasyon Mr Pool in vin a en moman apropiye.

Mon dir en moman apropiye akoz in annan en nouvo lapros politik dan pei depi Oktob 2025. So, Prezidan Dr Herminie, in santi i bezwen reouver Lanbasad *Havana Cuba*. E mon krwar i pa'n fer sa zis akoz in anvi fer. In fer sa akoz in war potansyel kot Sesel i kapab benefisye plis ki nou ti pe benefisye anba ladministrasyon presedan.

Akoz mon pe dir sa Madanm Speaker, se akoz nou tou nou konnen poudir ti

annan bann Dokter Kiben isi in ed Sesel en kantite. A en moman pou en rezon ou en lot in diminyen, e mon krwar ki nou Sistenm Lasante i merit revwar anba nouvo ladministrasyon dirize par Prezidan Dr Herminie. Otomatikman nou bezwen al rod led a leksteryer.

Nou tou nou konnen ki poudir *Cuba* i prodwir bann bon dokter. E Mr Pool fek fer sorti pou al negosye pou nou ganny plis spesyalis lo kote lasante. I pa zis lo kote lasante Madanm Speaker, i osi lo kote *sports*. Lo kote *sports* nou war bann atlet Kiben pe al partisip dan bann konpetisyon mondyal e zot fer rezilta.

E i annan laboks ek atletik. En nou Sesel nou'n temway prezans lantrener Kiben isi ki'n fer nou bann atlet al perform lo nivo *World Championship* an 2012. E i premye fwa ki en atlet madanm Sesel i ganny li en Meday *Silver* dan *World Championship*. Savedir potansyel pou nou ganny bann lantrener pou vini pou *train* nou bann atlet, pou nou ganny rezilta e sa i en bon direksyon.

Akoz si nou pe regard ozordi mon krwar tou Seselwa pou dakor avek mwan nivo *sport* dan Sesel in desann en

kantite. Prezan nou bezwen al rod bann dimoun ki annan lekspertiz menm a vini a form nou bann lantrener, *train* nou bann atlet. E demen nou ava annan larelev.

E se sa ki mon pou siport sa nominasyon Mr Pool, aköz mon santi ki Prezidan Dr Patrick Herminie in fer en bon desizyon pou ouver sa Lanbasad *Havana Cuba*. Mersi Madanm Speaker.

MADAM SPEAKER

Mersi. Onorab Gill.

HON CHURCHILL GILL

Mersi Madanm Speaker. Madanm Speaker, ozordi la *diplomacy* enternasyonal in pran en lot dimansyon. I kapab en pe letan pase 10an pase, 15an pase petet ti annan diferan dimoun ti annan diferan perspektiv lo en pei parey *Cuba*.

Me selman nou tou nou konnen ki la diplomasi in evolye ozordi dan lemonn. E tou pei dan en fason ou en lot zot sey rod fason pou konekte avek en lot pei. E sa i pa en keksoz kot zis 1 pei i benefisye. I toultan tou lede pei i benefisye. E ozordi la diplomasi in pran en lot lanpler kot preski tou pei i konekte dan en fason ou en lot.

E nou Sesel, *given* nou grander nou pa kapab mank sa loportinite pou nou osi konekte avek diferan pei ki nou santi i annan potansyel ki nou kapab benefisye, oubyen sa pei benefisye ek nou. Alors, i toutafe normal ki ozordi nou pe war diplomasi Seselwa i pe *extend* dan bann landrwa kot ozordi nou napa Lanbasad.

An menm tan nou pe ranforsi bann landrwa ki nou deza annan. E zisteman sa pou nou kapab koman en pei benefisye maksimonm, konekte maksimonm. E an menm tan fer nou vizibilite vin dan en fason byen kler kot nou osi nou a ganny rekonnet parey ki nou devret rekonnet.

I kler ki sa nouvo ladministrasyon i konsyan sa tre byen. Me se sa ki nou pe war bann dimoun ki pe vin devan nou depi bomaten, bann dimoun ki annan leksperyans. E bann dimoun ki'n pare pou zot al travay pou sa lot letap ki Sesel pe antre li ladan anba sa nouvo ladministrasyon dirize par Prezidan Dr Herminie. Mersi Madanm Speaker.

MADAM SPEAKER

Mersi. Onorab Georges.

HON BERNARD GEORGES

Mersi Madanm Speaker. Madanm Speaker, Onorab Andre Pool parey nou'n vwar apre midi se en dimoun ki kalm ki poze e ki tou letan ki mwan mon'n konn li dan Lasanble. Annefe, in dir in pas apepre 30 dan Lasanble, 15 sa bann lannen nou'n la ansanm.

Donk, se en dimoun ki nou'n kapab konn li tre byen. E parey nou'n vwar la apre midi *what you see is what you get*. Se en dimoun ki napa naryen pou kasyet, i *humble* i kalm. E in fer son karyer, son parkour avek rezilta ki nou konnen. Si ozordi Prezidan Larepiblik in anvi anvoy li dan en landrwa spesifik pou en misyon spesifik, pou en rezon spesifik avek en bi spesifik nou konpran sa konzonktir.

E nou bezwen aksepte ki sa se en Polisi sa enn Gouvernman pou sa rezon spesifik. *Cuba*, mon ti anvi pran laparol apre midi pou reasir nou menm isi, Lepep Seselwa ki *Cuba* zanmen in en lennmi *LDS*. Lo enn sa, lo enn sa annefe Prezidan Ramkalawan in pandan son manda in ganny envite 2 fwa *Cuba*. Enn fwa en vol *State Visit*.

Donk i montre sa lanmitye ki Gouvernman ek Lepep Kiben i annan pou Gouvernman avek Lepep Seselwa pe enport son

kouler politik. Pe enport son baz filozofik ou politik. E se en relasyon ki nou bezwen mentenir. Mwan menm mon kapab dir e mon fyer poudir sa dernyen, mon pa ankor rankontre sa enn ki fek vini.

Me sa dernyen Anbasader Kiben ki ti isi li avek son Msye, ti'n vin en zanmi personnel 2 zanmi personnel plito. E ki nou ti annan en relasyon tre, tre etrwat aköz nou ti annan en lanmour pou bann menm keksoz. E prensipalman, lavi bann zil ek lavi kiltirel dan bann zil.

Mon kestyon apre midi, a Onorab Pool - Anbasader Pool byento mon sipoze. Se en preokipasyon ki dan en kote nou annan, me dan en lot kote nou kapab konpran. Aköz annan de fwa i arive ki en Prezidan i anvi apwent en Anbasader pou al dan en landrwa spesifik aköz spesifikite sa dimoun.

Me nou war sa resaman avek lapwentman Madanm Cilla Mangroo, ki ti en dimoun ki i ti konn byen *trade*. E li i ti pe al *Geneve* kot *WTO* i ete, aköz son konesans dan sa domenn. E mon mazin ki menm keksoz i aplike pou Onorab Pool.

Alor, mon sel problem sete, eski benefis ki nou pou

gannye pou *out way* kou *setup* en nouvo anbasader. Akoz Lanbasad i en keksoz ki kout bokou larzan, i pa zis en kestasyon met en nouvo Anbasader dan en biro. Me i annan tout en tra ilala ki vin avek e ki kout larzan, akoz ou bezwen mentenir serten en serten nivo.

Alor, nou pa ekspekte ki Onorab Pool pa pou fer li dan desarz son fonksyon. E sa relasyon ki annan ant *Cuba* avek Sesel, i parey nou dir in dekoul dan plizyer landrwa dan *scholarships*, dan *training* ki nou'n gannye spesifikman dan domenn medikal. E sa se en keksoz ki bezwen kontinyen.

In annan problem resaman dan sa dernye detrwa lannen, pa pou annan pou fer ek okenn politik oubyen okenn relasyon bilateral ant sa 2 pei. Me pou annan pou fer avek sanksyon ki Leta Zini, Lanmerik in mete lo bann peyman an dolar. E ki'n fer ki larzan ki Sesel i pey pou bann dokter Kiben ki isi in ganny bloke, akoz si i ganny peye i pou *breach* sa sanksyon. E nou pou ganny en problem.

E mon swete ki atraver sa diplomasi ki pou swiv, avek sa nouvo anbasader ki fek arive isi Sesel, e sa enn ki pou pran son *post Havana* byento. En

solisyon ava kapab ganny trouve pou ki sa relasyon i ava kapab kontinyen dan lentere e pou benefis nou 2 nasyon. E mon kapab dir Madanm Speaker ki mwan mon enn sa bann dimoun ki pe priye pou mwan al vizit. Akoz toultan mon'n en pe *in love* avek lesprisa zil.

E mon espere ki tre byento, lannen prosenn akoz mon annan en vwayaz ki mon sipoze fer pou *PGA*, ki pe anmenn mwan dan sa rezyon kekfw mon ava ganny en pti loportinite pou mwan sot en kou *Cuba*. E kekfw salye Onorab Pool si in deza pran son *post*. Vwala Madanm Speaker, mon ti anvi fer sa detrwa presizyon la apre midi pou nou site sa ki nou pe fer dan son konteks. Mon remerci ou.

MADAM SPEAKER

Mersi. Onorab Aglae.

HON EGBERT AGLAE

Mersi Madanm Speaker. E bonn apre midi tou dimoun. Madanm Speaker, mon konn Msye Andre Pool ki byento i pou vin an Lanbasader Pool. En kantite letan pase dan mon parkour, depi ler mon pe travay menm avek Minister Lasante mon'n konn li.

In en dimoun ki'n *humble* mon kapab dir. E i en dimoun ki ekoute. E osi i en dimoun ki pou touzour partaz *the best of the best, the best practices* avek ou pou gid ou. Akoz i en zonm ki'n fer en pe parkour dan son lavi. E pou mwan ler mon pe get son CV, e i mansyonnen son rol ki in zwe e ki i pou al zwe dan sa parkour apre sa lapwentman.

I en dimoun ki mon konvenki i ankor annan lenerzi pou li kapab donner. E letan nou pe koz sa pei an kont se *Cuba*. E nou tou konnen poudir listwar *Cuba* in annan en tansyon diplomasi avek Lanmerik tou kou. Malgre plizyer zefor ki zot in fer pou sey redres sa stati, i pa'n enn ki fasil dan zot parkour. E zot en pri ki'n *struggle* en kantite ekonomikman, akoz bann sanksyon ki'n arive.

E Sesel in touzour gard en relasyon ase etrwat *Cuba* malgre son bann difikilte ki in fer fas avek. E nou, nou reste nou touzour en pei non-anlinyen ou pa'n enterfer dan son sityasyon diplomatik dan en fason. Ouswa pou sey sanz stati, me nou'n reste en pei zanmi, *ok*. E nou osi nou bezwen konsyan e dan en fason nou dir mersi pou bann sipor ki

Cuba in donn Sesel. Plizyer Seselwa in al *training Cuba*.

Plizyer Seselwa in pas ouswa in ganny zot swa diplom, swa zot bann degre. E osi plizyer atlet in perform lo diferan nivo enternasyonal atraver bann *training* ki zot in ganny sipor avek *Cuba*. Wi, mon santi poudir petet sa Gouvernman ki vini i annan son fason fer, e fason vwar zot relasyon diplomatik avek bann diferan pei.

E parfwa sa ki lo latet, sa *Head of State* i pa neseserman annan serten bon relasyon avek en lot *Head of State* osi. Me selman i annan en relasyon avek sa pei. Mon dir sa akoz dan letan Mr Barrack Obama. *Cuba* sa bann sanksyon, serten sa bann komers, bann tranzaksyon finansyel ti'n ganny ease off en pe. *Ok*, ti'n ganny *ease off* en pe.

E *Cuba* ti pe komans mon kapab dir ouver en pti pe pli ouver. E nou konnen son predeseser Prezidan ki ti la ti pas sa... mon pa pou al dan sa kalite zistwar la. Me selman keksoz ti pe amelyor en pti gin. E dan letan Mr Biden osi, Prezidan Biden toudenkou in annan en sanzman la ki'n arive, *ok*. Depi ler Prezidan *Trump* in rebran ankor, nou war poudir sa relasyon san ki mon bezwen

enterfer dan okenn relasyon diplomatik in annan en serten sanzman, *ok*.

Kot zot in war zot reganny kwense dan en fason. Sa ki ti arive dan listwar dan lepase, i en keksoz ki mon krwar sa ki konpran sa zistwar byen. I annan en keksoz ki sagrinan dan en fason, me selman ou pa kapab dan en fason pe kontinyen parfwa pe soumet menm si ou seye.

Nou war sa isi Sesel parfwa dan konteks kot nou bezwen *adhere* avek bann diferan legzizans lemonn Eropeen, menm Meriken kot nou bezwen *toe the line*. I napa naryen mal ek *toe the line*, me selman zot bezwen osi pran kont poudir en pei souvrennte osi i annan son fason fer, son tradisyon son kiltir, son fason ki i anvi osi.

E se la ki parfwa mon krwar lemonn i en pti pe boulders. E i kre bann size, la i pa zis *Cuba* i annan bann lezot pei osi. So, mwan mon santi ki poudir si nou ouver en Lanbasad *Cuba* ki nou bezwen fer, ki pe al arive malgre ki Gouvernman presedans *LDS* li i ti deside ferm sa. E nou ti war sa tandans depi 2016 avan zot vin o pouvwar kot ti annan plizyer kritik avek sa Lanbasad,

sa Anbasader. Ti annan enn de keksoz ti ganny fer.

Mon pa pou al ladan, annou pa mon pa anvi al dan sa bann detay. Me selman nou ti pe vwar tandans. Petet zot filozofi politik pa ti parey, i pa anlany avek sa ki pou nou. Nou respe sa, i normal sa. Me nou kote *US* nou santi ki poudir nou pa pou zet en zanmi malgre i dan difikilte, *ok*.

In ed nou dan lepase, e nou santi i kapab annan kontribisyon ki nou, nou kapab fer pou kontinyen met ed lede parti. E dan size medikal i enn ki enportan sa, *ok*. Onorab Georges atraver ou in nonmen poudir Prezidan Ramkalawan ti al 2 fwa *Cuba*. Wi, in ale. Me eski ti annan en lagreman ki zot ti tonm dakor lo sa enn keksoz ouswa zot pa'n bouz lo sa bann *offer* ki *Cuba* ti met devan, *ok*. Sa osi nou ti a kontan konnen.

Me selman lefe i reste ki nou'n perdi plizyer spesyalis. Dan lasante nou bezwen bann spesyalis *cardiologist* nou bezwen. Ozordi nou annan zis en *Vascular Surgeon* dan Sesel, zis enn. Nou bezwen tousala. Nou bezwen *Oncologist* tousala nou bezwen. So, *Cuba* i en pei ki pare pou ed nou konpare ek Lanmerik ki kan ou pou ganny en lasistans ek li parey bann

lezot pei i fer pei zanmi atraver nou.

Byen rar ki zot pou vini zot pou ofer Sesel en keksoz. Si zot ofer Sesel en keksoz, zot bezwen en keksoz ek Sesel dabor. Sa i zot fason panse, zot fason politik mon pou dir sa fran. Me nou pou reste avek enn ki nou krwar ki letan nou tap son laport i pare pou ed nou, san kondisyon. E osi dan nou fason pou nou, nou ed li ki mannyer nou kapab fer.

So, mwan mon pa kont sa desizyon pou apwent Mr Pool. E pou ouver en Lanbasad *Cuba*, aköz *Cuba* i en pei zanmi ki i pa'n fer nou naryen. E nou, nou pa'n fer *Cuba* naryen. Mersi.

MADAM SPEAKER

Mersi. Onorab Lemiel, *right of reply*.

HON SYLVANNE LEMIEL

Mersi Madanm Speaker. Mon remersi tou dimoun ki'n fer lentervansyon. E Madanm Speaker, nou'n annan nou en zonm, en zonm ki'n annan en vast leksperyans dan responsabilite Lezislatif. E in donn nou son parkour ozordi atraver bann diferan pozisyon ki petet in pran isi menm dan nou Lasanble Nasyonal.

E bann diferan Komite Enternasyonal osi ki in en

Manm lo la. e ki li menm li in dir in defann en pti pe, e anmenn petet lopinyon Sesel lo sa bann diferan lo sa bann diferan Komite ki petet sa letan li i ti en Manm lo la. E in fer nou konpran osi ki in travay en pe pre avek *Foreign Affairs*.

E Onorab Pool i annan en lo kote langaz nou kapab dir in fer nou konpran ki i kapab koz Espanol ki sa osi i pou vreman en keksoz vreman, vreman itil e i enportan. I pa zis koze i ekrir osi sa langaz. E sa i pou ed li dan sa travay ki i pe gannyen pou li or ki i pe ganny demande pou li al fer laba *Cuba*.

Avek son lekspertiz ki i annan, e kapab koz langaz Espanol ki Kiben osi i servi sa langaz. I pou mon santi ki Onorab Pool i pou vreman kapab pous bokou keksoz enportan dan diferan domenn kot Sesel i kapab benefisye. Li menm li in dir nou atraver *sports*, nou konnen ki poudir i annan bokou zenn la deor. I annan ki pe espere pou ganny en pti *scholarship* zot anvi al fer bann *attachment* li menm dan bokse nou annan bokou zenn la deor ki'n menm zot in komans fer bann demann dan sa laliny.

E mon pe mazine ki avek lasistans Onorab Pool dan en Lanbasad laba i ava kapab fasilite sa bann keksoz. En *MOU*

avek Minister Lasante fek ganny sinyen, par *Ambadress* sortan. E ki mon konpran en bon pe letan i ti la, me selman pa ti ankor ganny sinyen. Me erezman avan in ale sa *MOU* in kapab sinyen, kot Sesel i ava benefisye avek plis dokter e lezot spesyalis ki ava kapab vin ed nou en pti pe dan nou domenn Lasante.

E petet ede osi atraver sa bann long lalis ki parfwa Minister Lasante i annan pou zot kapab vwar en spesyalis. So, alors Madanm Speaker, mon vwar ki Mr Pool avek son kalite ki i annan e son parkour ki in pas ladan i en dimoun ki pou kapab desarz sa responsabilite koman en anbasader. Sirtou *Cuba* kot i pe al ganny poste. E alors, mon ti a kontan demann nou Lasanble pou nou aprouv propozisyon son apwentman ki Prezidan in vin met devan nou Lasanble ozordi koman Anbasader *Extraordinary and Plenipotentiary* pou Repiblik Sesel. Mersi.

MADAM SPEAKER

Mersi. Nou aprezan ariv ler pou nou pran en vot lo Mosyon. *In accordance with Articles 63(1) and 64(1) of the Constitution, the National Assembly approves the proposed appointment by the President of the Republic of Mr.*

Andre Louis Bernard POOL as Ambassador Extraordinary and Plenipotentiary of the Republic of Seychelles.

Tou bann Manm ki an faver Mosyon? Mersi. Okenn Mnam ki vot kont? Vot lo Mosyon i 19 Manm in vot pour avek 10 ki'n *abstain*. Nou'n alors ariv a lafen nou azanda pou ozordi. Nou pou aprezan *adjourn* ziska demen bomaten 9er.

(ADJOURNMENT)

